

今體詩鈔

冊一



線

831.4

757-2

v. 1

舊籍



今
鈔

今

體

詩

鈔



四部備要

集部

上海中華書局據原刻本

校刊

桐鄉 陸費達 總勘

杭縣 高時顯 輯校

杭縣 吳汝霖 校

杭縣 丁輔之 監造

總

831.4

757-2

11

五七言今體詩鈔序目

天下之是非有不可得而淆也而人以己意決之則不能不淆其不淆者必其當於人心之公意者也人心之公意雖具於人人而當其始無一人發之則人之公意不見苟發之而同者會矣論詩如漁洋之古詩鈔可謂當人心之公者也吾惜其論止古體而不及今體至今日而爲今體者紛紜岐出多趨譌謬風雅之道日衰從吾游者或請爲補漁洋之闕編因取唐以來詩人之作采錄論之分爲二集十八卷以盡漁洋之遺志雖然漁洋有漁洋之意吾有吾之意吾觀漁洋所取舍亦時有不盡當吾心者要其大體雅正足以維持詩學導啓後進則亦足矣其小小異同嗜好之情雖公者不能無偏也今吾亦自奮室中

國家圖書館



002452229

10131740

之說前未必盡合於漁洋後未必盡當於學者然
存古人之正軌以正雅祛邪則吾說有必不可易者
世之君子其亦以攬其大者求之嘉慶三年二月桐
城姚鼐識

聲病之學肇于齊梁以是相沿遂成律體南北朝迄
隋諸詩人警句率以儷偶調諧正可謂之律耳阮亭
五言古詩中既已錄之今不更載所載斷自唐人陳
拾遺杜脩文沈宋曲江此爲開元以前之傑鈔初唐
五言今體詩一卷

盛唐人詩固無體不妙而尤以五言律爲最此體中
又當以王孟爲最以禪家妙悟論詩者正在此耳鈔
王孟詩一卷常建以下十五人又一卷
盛唐人禪也太白則仙也於律體中以飛動票姚之

勢運曠遠奇逸之思此獨成一境者鈔太白詩一卷
杜公今體四十字中包涵萬象不可謂少數十韻百
韻中運掉變化如龍蛇穿貫往復如一綫不覺其多
讀五言至此始無餘憾余往昔見蒙叟箋於其長律
轉折意緒都不能了頗多謬說故詳爲詮釋之鈔杜
詩二卷

中唐大歷諸賢尤刻意於五律其體實宗王子孟氣則
弱矣而韻猶存貞元以下又失其韻其有警拔蓋亦
希矣今鈔韋蘇州下二十一人爲一卷劉夢得以下
十二人爲一卷

晚唐之才固愈衰然五律有望見前人妙境者轉賢
於長慶諸公此不可以時代限也元微之首推子美
長律然與香山皆以多爲貴精警缺焉余盡不取惟

玉谿生乃略有杜公遺響耳今鈔晚唐以玉谿爲冠
合十八人共一卷

右五言今體詩共九卷

夫文以氣爲主七言今體句引字賒尤貴氣健如齊
梁人古色古韻夫豈不貴然氣則躓矣楊升庵專取
爲極則此其所以病也初唐諸君正以能變六朝爲
佳至盧家少婦一章高振唐音遠包古韻此是神到
之作當取冠一朝矣鈔初唐七言今體詩一卷

右丞七律能備三十二相而意興超遠有雖對榮觀
燕處超然之意宜獨冠盛唐諸公于鱗以東川配之
此一人私好非公論也鈔盛唐詩一卷

杜公七律含天地之元氣包古今之正變不可以律
縛亦不可以盛唐限者鈔杜詩一卷

大歷十子以隨州爲最其餘諸賢亦各有風調至於
長慶香山以流易之體極富贍之思非獨俗士奪魄
亦使勝流傾心然滑俗之病遂至濫惡後皆以太傅
爲藉口矣非慎取之何以維雅正哉鈔中唐詩一卷
玉谿生雖晚出而才力實爲卓絕七律佳者幾欲遠
追拾遺其次者猶足近掩劉白第以矯敝滑易用思
太過而僻晦之敝又生要不可不謂之詩中豪傑士
矣鈔玉谿詩一卷附温詩數首然於玉谿爲陪臺非
可與並立也

唐末詩人才力旣異於前而習俗所移又難振拔故
傑出益少然亦未嘗無佳句也鈔晚唐五代詩一卷
西崑諸公之儼玉谿但學其隸事耳殊滯於句下都
成死語其餘宋初諸賢亦皆域於許渾韋莊輩境內

歐公詩學昌黎故於七律不甚留意荆公則頗留意
矣然亦未造殊妙今自宋初至荆公兄弟共爲一卷
東坡天才有不可思議處其七律只用夢得香山格
調其妙處豈劉白所能望哉山谷刻意少陵雖不能
到然其兀傲磊落之氣足與古今作俗詩者澡濯胸
胃導啓性靈鈔蘇黃詩一卷蘇門諸賢附焉

放翁激發忠憤橫極才力上法子美下攬子瞻裁制
旣富變境亦多其七律固爲南渡後一人其餘如簡
齋茶山誠齋諸賢雖有盛名實無超詣今爲略采一
二逮於宋末併附放翁之後鈔南宋詩一卷

右七言今體詩共九卷

此五七言今體詩鈔十八卷昔曾開雕於金陵
今先生復加刪訂郵寄示瑞瑞謂是編雖與

王文簡公古詩鈔意趣稍殊而其足以維持詩教啓迪後學則一也爰重爲校付剞劂時嘉慶十三年十月績溪程邦瑞謹識





十三年十月八日

後忽被對學限一由吳重德林甘竹陳顯發無與
王文讀全古翰地意賦辭叙而其只以點符結

五言今體詩鈔卷第一

王無功一首

野望

東臯薄暮望徙倚欲何依
樹樹皆秋色山山惟落暉
義兼此興牧人驅犢返獵馬帶禽歸
相顧無相識長歌懷采薇

蘇味道二首

正月十五日夜

火樹銀花合星橋鐵鎖開
暗塵隨馬去明月逐人來
游伎皆穠李行歌盡落梅
金吾不禁夜玉漏莫相催

夜游

今夕重門啓游春得夜芳
月華連晝色鐙影雜星光
南陌青絲騎東鄰紅粉粧
管絃遙辨曲羅綺暗聞香

人擁行歌路車攢鬪舞場經過猶未已鐘鼓出長楊

王子安二首

銅雀伎

金鳳鄰銅雀漳河望鄴城君王無處所臺榭若平生
舞席紛何就歌梁儼未傾西陵松檟冷誰見綺羅情

杜少府之任蜀州

城闕輔三秦風煙望五津與君離別意俱是宦游人
海內存知己天涯若比鄰無為在岐路兒女共沾巾

用陳思贈白馬王彪詩意思實自渾轉

楊炯一首

送劉校書從軍

天將下三宮星門列五戎

後漢書高彪送第五永箴天有太一五將三門章懷

注三門者開門生門休門五將天目文昌等隨天文志北落師門一星師門猶軍門也主非常以候兵

坐謀資廟略飛檄佇文雄赤玉流星劍烏號明月弓
秋陰生蜀道殺氣遶湟中風雨何年別琴尊此日同
離亭不可望溝水自西東

駱賓王一首

宿温城望軍營

虜地寒膠折邊城夜柝聞兵符關帝闕天策動將軍
塞靜胡笳徹沙明楚練分風旗翻翼影霜劍轉龍文
白羽搖如月青山斷若雲煙疏疑卷幔塵滅似銷氛
投筆懷班業臨戎想召勳還應雪漢恥持此報明君
盧昇之一首

西使兼送孟學士南歸

地道巴陵北天山弱水東相看萬餘里共倚一征篷
四句出于尹式而勝之零雨悲王粲清尊別孔融
裴衷聞夜鶴

一珍做宋版印
悵望待秋鴻骨月胡秦外風塵關塞中惟餘劍鋒在
耿耿氣成虹

陳伯玉七首

月夜有懷

美人挾趙瑟微月在西軒寂寞夜何久殷勤玉指繁
清光委衾枕遙思屬湘沅空簾隔星漢猶夢感精魂

晚次樂鄉縣

故鄉杳無際日暮且孤征川原迷舊國道路入邊城
野戍荒煙斷深山古木平如何此時恨噉噉夜蟻鳴
春夜別友人

銀燭吐青煙金樽對綺筵離堂思琴瑟別路遶山川
明月隱高樹長河沒曉天悠悠洛陽道此會在何年

從小謝離夜
一首脫化來

送客

故人洞庭去楊柳春風生相送河洲晚蒼茫別思盈
白蘋已堪把綠芷復含榮江南多桂樹歸客贈生平

送魏大從軍

匈奴猶未滅魏絳復從戎悵別三河道言追六郡雄
鴈山橫代北狐塞接雲中勿使燕然上唯留漢將功

白帝城懷古

日落滄江晚停橈問土風城臨巴子國臺沒漢王宮
荒服仍周甸深山尚禹功巖縣青壁斷地險碧流通
古木生雲際歸帆出霧中川途去無限客思坐何窮

峴山懷古

秣馬臨荒甸登高覽舊都猶悲墮淚碣尚想臥龍圖
城邑遙分楚山川半入吳邱陵徒自出賢聖已凋枯

野戍蒼煙斷津樓晚氣孤誰知萬里客懷古正踟躕
已一作幾

杜必簡四首

登襄陽城

旅客三秋至層城四望開楚山橫地出漢水接天回
冠蓋非新里章華卽舊臺習池風景異歸路滿塵埃
夏日過鄭七山齋

共有尊中好言尋谷口來薜蘿山徑入荷芰水亭開
日氣含殘雨雲陰送晚雷雒陽鐘鼓至車馬繫遲回
和康五庭芝望月有懷

明月高秋迥愁人獨夜看斲將弓並曲翻與扇俱團
露濯清輝苦風飄素影寒羅衣一此鑒頓使別離難
和李大夫嗣真奉使存撫河東

六位乾坤動

從周代唐起

三微歷數遷

漢律歷志歷數三統天以甲子地以

甲辰人以甲申孟仲季迭用

事爲統首三微之統既著 謳歌移火德圖讖在金

天

遺存撫使在天授元年九月長壽二年武后乃號金輪皇帝然天授時必已有此說金輪出佛經不

典故借少昊

子月開階統房星受命年

武后紀天授元年以十一

月爲正月孔演圖天子必有神靈符

紀開階立統元命包周興五星聚房

積符龍馬出寶

錄鳳皇傳地卽交風雨都仍卜瀾瀾

字字與切明堂唯御

極清廟乃尊先

垂拱四年得寶圖於洛水毀乾元殿作明堂天授元年尊周文王爲始祖

文皇

不宰神功運無爲大象縣八方平物土四海接

人煙已屬羣生泰

入遣使

猶言至道偏璽書傍問俗旌

節近推賢秩比司空位

入李大夫

官臨御史員推詞執刀

筆直諫罷樓船國有大臣器朝加小會筵將行備禮

樂送別仰神仙城闕周京轉

入河東

關河陝服連稍觀

汾水曲俄指絳臺前姑射聊長望平陽遂宛然舜耕

餘草木禹鑿舊山川昔出諸侯上無何霸業全中軍
歸戰敵外府絕兵權隱隱帝鄉遠瞻瞻肅命虔西河

偃風俗東壁掛星躔井邑枌榆社陵園松柏田

武后文水

人榮光晴掩代佳氣晚侵燕雨霏鴻私滌

入存撫

風行

睿旨宣惇嫠訪疾苦屠釣採貞堅人樂逢刑措時康

洽賞延賜踰秦氏級恩倍漢家錢擁傳咸翹首稱觴

競比肩拜迎彌道路舞詠溢郊鄙殺氣西衝白窮陰

北陸元飛霜遙渡海殘月迴臨邊緬邈朝廷問周流

朔塞旋興來探馬策

陸翹鄴中記魏文帝云余從上拜墳墓遵渭水

尚祥乎高樹下

駐馬書鞭爲臨濁賦興來句用此

濁

俊發抱龍淵學總八千卷文傾三

百篇澄清得使者作頌有人焉

入和詩

莫以崇班闕而

云勝託捐偉才何磊落陋質幾翩翩江海甯爲讓巴

渝轉自牽一聞歌聖道助曲荷陶甄

雖貢諛牝朝而壯麗精切實長

律佳
製

沈雲卿五首

夜宿七盤嶺

獨遊千里外高臥七盤西山月臨窗近天河入戶低
芳春平仲綠清夜子規啼浮客空留聽衰城聞曙雞

游少林寺

長歌游寶地徙倚對珠林鴈塔風霜古龍池歲月深
紺園澄夕霽碧殿下秋陰歸路煙霞晚山蟬處處吟

雜詩

聞道黃龍戍頻年不解兵可憐閨裏月偏照漢家營
少婦今春意良人昨夜情誰能建旗鼓一爲取龍城
酬蘇味道夏晚寓直省中

並命登仙閣通宵直禮闈

建禮是晉宋以來宮門名也晉百官志尚書郎更直

沈雄之作落
句未免意盡

夏日仙萼亭應制

高嶺逼星河乘輿此日過
野舍時雨潤山雜夏雲多
睿藻光巖穴宸襟洽薜蘿
悠然小天下歸路滿笙歌

奉和晦日幸昆明池應制

春豫靈池會滄波帳殿開
舟凌石鯨度槎拂斗牛迴
節晦莫全落春遲柳暗催
象溟看浴景燒劫辨沈灰
鑄飲周文樂汾歌漢武才
不愁明月盡自有夜珠來

靈池會一作靈池近

登越臺

江上越王臺升高望幾回
南溟天外台北戶日邊開
地溼煙常起山晴雨乍來
冬花採盧橘夏果摘楊梅
迹類虞翻枉人非賈誼才
歸心不可度白髮重相催

靈隱寺

鷲嶺鬱嵒峽龍宮鎖寂寥樓觀滄海日門對浙江潮
桂子月中落天香雲外飄捫蘿登塔遠劔木取泉遙
霜薄花更發冰輕葉互凋夙齡尚遐異披對滌煩囂
待入天台路看余渡石橋

鎖一作隱取一作會

早發始興江口至虛氏村作

候曉逾閩嶂乘春望越臺宿雲鵬際落殘月蚌中開
薜荔搖青氣桄榔翳碧苔桂香多露裊石響細泉回
抱葉元蟻嘯銜花翡翠來南中雖可悅北思日悠哉
鬢髮俄成素丹心已作灰何當首歸路行翦故園萊

李巨山一首

送李邕

落日荒郊外風景正淒淒離人席上起征馬路傍嘶

別酒傾壺贈行書掩淚題殷勤御溝水從此各東西

元宗皇帝三首

送賀知章

遺榮期入道辭老竟抽簪豈不惜賢達其如高尚心
環中得祕要方外散幽襟獨有青門錢羣僚悵別深

莊子樞始得其環中以
應無窮刻本作寰誤也

早度蒲津關

鐘鼓嚴更曙山河野望通鳴鑿下蒲坂飛旆入秦中
地險關逾壯天平鎮尚雄春來津樹合月落戍樓空
馬色分朝景雞聲逐曉風所希常道泰非復候繻同

秀雄

左丞相說右丞相璟太子少傅乾曜同日上官

命宴東堂賜詩

赤帝收三傑黃軒舉二臣由來丞相重分掌國之鈞
我有握中璧雙飛席上珍子房推道要仲子訝風神
復綴台衡老將爲調護人鷓鴣同拜日車騎擁行塵
樂聚南宮宴觴連北斗醇俾予成百揆垂拱問彝倫

題繁序來
卻自軒翥

張道濟四首

幽州夜飲

涼風吹夜雨蕭瑟動寒林正有高堂宴能忘遲暮心
軍中宜劍舞塞上重笳音不作邊城將誰知恩遇深

託意
深婉

還至端州驛前與高六別處

舊館分江口淒然望落暉相逢傳旅食臨別換征衣
昔記山川是今傷人代非往來皆此路生死不同歸

奉和聖製途經華嶽

西嶽鎮皇京中峯入太清玉鑿重嶺應緹騎薄雲迎
白日縣高掌寒空映削成軒游會神處漢幸望仙情
舊廟青林古新碑綠字生羣臣願封岱迴駕勒鴻名
將赴朔方軍應制

禮樂逢明主韜鈴用老臣恭憑神武策遠靜鬼方人
供帳恩榮錢山川喜詔巡天文日月麗朝賦管絃新
幼志傳三略衰材謝六鈞膽猶忠作屏心故道爲鄰
漢保河南地胡清塞北塵連年大軍後不日小康辰
劍舞輕離別酣歌忘苦辛從來思博望許國不謀身

雄整

郭元振一首

塞上

塞上虜塵飛頻年出武威死生隨玉劍辛苦向金微
久戍人將老長征馬不肥仍聞酒泉郡已合數重圍
張子壽六首

望月懷遠

海上生明月天涯共此時情人怨遙夜竟夕起相思
滅燭憐光滿披衣覺露滋不堪盈手贈還寢夢佳期

是五律
中離騷

初秋憶金均兩弟

江渚秋風至他鄉離別心孤雲愁自遠一葉感何深
憂喜常同域飛鳴忽異林青山西北望堪作白頭吟

詠燕

海燕何微眇乘春亦暫來豈知泥滓賤祇見玉堂開
繡戶時雙入華軒日幾回無心與物競鷹隼莫相猜

奉和聖製早度蒲關

魏武中流處軒皇問道回長堤春樹發高掌曙雲開
龍負王舟渡人占仙氣來河津會日月天仗役風雷
東顧重關盡西馳萬國陪還聞股肱郡元首詠康哉
郡齋閒思
郡閣晝長掩庭蕪日復滋檐風落鳥毳窗葉掛蟲絲
拙病患情少羈閒秋氣悲理人無異績爲郡但經時
惟有江湖意沈冥空在茲

奉和聖製送尚書燕國公赴朔方

宗臣事有征廟算在休兵天與三台座人當萬里城
朔南方偃草河右躡揚旌寵錫從仙禁光華出漢京
山川勤遠略原隰軫皇情爲奏薰琴唱仍題寶劍名
聞風六郡伏計日五戎平山甫歸應疾留侯功復成

歌鐘旋可望衽席豈難行
四牡何時入吾君聽履聲
賀季真一首

送人之軍

嘗經絕脉塞復見斷腸流
送子成今別令人起昔愁
隴雲晴半雨邊草夏先秋
萬里長城寄無貽漢國憂
孫逖一首

宿雲門寺閣

香閣東山下煙花象外幽
縣燈千嶂夕捲幔五湖秋
畫壁餘鴻鴈紗窗宿斗牛
更疑天路近夢與白雲游
常理一首

古別離

君御狐白裘妾居細綺幃
粟鈿金夾膝花錯玉搔頭
離別生庭草征衣斷戍樓
蠹蛸網清曙菡萏落紅秋

小膽空房怯長眉滿鏡愁爲傳兒女意不用遠封侯

此學薛道衡昔昔鹽

五言今體詩鈔卷第一



五言今體詩鈔卷第二

王摩詰四十七首

山居秋暝

空山新雨後天氣晚來秋
明月松閒照清泉石上流
竹喧歸浣女蓮動下漁舟
隨意春芳歇王孫自可留

終南別業

中歲頗好道晚家南山陲
興來每獨往勝事空自知
行到水窮處坐看雲起時
偶然值林叟談笑無還期

歸嵩山作

晴川帶長薄車馬去閒閒
流水如有意暮禽相與還
荒城臨古渡落日滿秋山
迢遞嵩高下歸來且閉關

輞川閒居贈裴秀才迪

寒山轉蒼翠秋水日潺湲
倚杖柴門外臨風聽暮蟬

渡頭餘落日墟里上孤煙復值接輿醉狂歌五柳前

歸輞川作

谷口疏鐘動漁樵稍欲稀悠然遠山暮獨向白雲歸
菱蔓弱難定楊花輕易飛東臯春草色惆悵掩柴扉

終南山

太乙近天都連山到海隅白雲迴望合青靄入看無
分野中峯變陰晴衆壑殊欲投人宿處隔水問樵夫

秋夜獨坐

獨坐悲雙鬢空堂欲二更雨中山果落燈下草蟲鳴
白髮終難變黃金不可成欲知除老病惟有學無生

山居卽事

寂寞掩柴扉蒼茫對落暉鶴巢松樹徧人訪華門稀
綠竹含新粉紅蓮落故衣渡頭煙火起處處採菱歸

輞川閒居

一從歸白社不復到青門時倚檐前樹遠看原上村
青菰臨水映白鳥向山翻寂寞於陵子桔槔方灌園
淇上卽事

屏居淇水上東野曠無山日影桑柘外河明閭井閒
牧童望村去田犬隨人還靜者亦何事荆扉乘晝關
漢江臨泛

楚塞三湘接荆門九派通江流天地外山色有無中
郡邑浮前浦波瀾動遠空襄陽好風日留醉與山翁
使至塞上

單車欲問邊屬國過居延征蓬出漢塞歸鴈入胡天
大漠孤煙直長河落日圓蕭關逢候吏都護在燕然
觀獵

風勁角弓鳴將軍獵渭城草枯鷹眼疾雪盡馬蹏輕
忽過新豐市還歸細柳營回看射鵰處千里暮雲平

過香積寺

不知香積寺數里入雲峯古木無人徑深山何處鐘
泉聲咽危石日色冷青松薄暮空潭曲安禪制毒龍

登辨覺寺

竹徑從初地蓮峯出化城窗中二楚盡林上九江平
軟草承趺坐長松響梵聲空居法雲外觀世得無生

過感化寺曇興上人山居

暮持筇竹杖相待虎谿頭催客聞山響歸房逐水流
野花叢發好谷鳥一聲幽夜坐空林寂松風直似秋

送孟六歸襄陽

閉門不復出久與世情疏以此爲長策勸君歸舊廬

醉歌田舍酒笑讀古人書好是一生事無勞獻子虛

此詩即效孟公體

送梓州李使君

李蓋謫降官故詩言漢女巴人陋俗若不足道也然翻教授之

不以先賢居下州爲恨

萬壑樹參天千山響杜鵑山中一夜雨樹杪百重泉

漢女輸幢布巴人認芋田文翁翻教授不敢倚先賢

送劉司直赴安西

絕域陽關道胡沙與塞塵三春時有鴈萬里少行人

首蓓隨天馬蒲桃逐漢臣當令外國懼不敢覓和親

雄渾

送平澹然判官

不識陽關路新從定遠侯黃雲斷春色畫角起邊愁

瀚海經年到交河出塞流須令外國使知飲月支頭

此首氣不逮絕域
一首而工與相埒

送楊長史赴果州

褒斜不容憶之子去何之鳥道一千里
蟻聲十二時
官橋祭酒客山木女郎祠
別後同明月君應聽子規

已似大歷閒人後漢劉焉傳張魯來學者初名鬼卒
後號祭酒諸祭酒各起義舍於路同之亭傳水經注
漢水南有女郎山山上有女郎冢下有女郎廟言
張魯女也詩用祭酒女郎皆言異俗荒陋之義

送崔九興宗游蜀

送君從此去轉覺故人稀
徒御猶回首田園方掩扉
出門當旅食中路授寒衣
江漢風流地游人何歲歸

送邱爲落第歸江東

憐君不得意況復柳條春
爲客黃金盡還家白髮新
五湖三畝宅萬里一歸人
知禰不能薦羞稱獻納臣

送岐州源長史歸

元注源與余同在崔常侍幕
中時常侍已沒右丞集有

爲崔祭牙門將文具其銜曰左
散騎常侍河西節度副大使

握手一相送心悲安可論秋風正蕭索客散孟嘗門
故驛通槐里長亭下權原征西舊旌節從此向河源

送方城韋明府

遙思葭菼際寥落楚人行高鳥長淮水平蕪故郢城
使車聽雉乳縣鼓應雞鳴若見州從事無嫌手板迎

送人南歸

萬里春應盡三江鴈亦稀連天漢水廣孤客郢城歸
鄖國稻苗秀楚人菰米肥縣知倚門望遙識老萊衣

送賀遂員外外甥

南國有歸舟荆門沂上流蒼茫葭菼外雲水與昭邱
檣帶城烏去江連暮雨愁蟻聲不可聽莫待楚山秋

送邢桂州

鏡吹喧京口風波下洞庭赭圻將赤岸擊汰復揚舲
日落江湖白潮來天地青明珠歸合浦應逐使臣星

送張五諲歸宣城

五湖千里外況復五湖西漁浦南陵郭人家春穀谿
欲歸江淼淼未到草萋萋憶想蘭陵鎮可宜緩夜啼

送李判官赴江東

聞道皇華使方隨阜蓋臣

後漢輿服志千石以上車阜蓋三百石以上阜布

蓋此皇華使蓋以宗室而為江南東路按察採訪等使者阜蓋臣謂李也漢魏舊制藩國所屬稱臣自宋元嘉以後禁不得稱臣稱下官而已此云阜蓋臣用古稱也

封章通左語冠冕化

文身樹色分揚子潮聲滿富春

唐時江南東路自建業南至杭州樹色一

聯恰盡其界內然與象甚妙非徒切也

遙知辨璧吏恩到泣珠人

辨璧吏用

朱暉為東平王蒼取少府壁事

送元中丞轉運江淮

上元二年中丞元載為江淮轉運使然則此是右丞

最晚年作矣一
以爲錢起詩

薄稅歸天府輕徭賴使臣
歡霑賜帛老恩及卷緒人
去問珠官俗來經石蚌
春東南御亭上莫使有風塵

同崔興宗送衡嶽瑗公南歸

言從石菌閣新下木陵關
獨向池陽去白雲留故山
綻衣秋日裏洗鉢古松閒
一施傳心法惟將戒定還

冬晚對雪憶胡居士家

寒更傳曉箭清鏡覽衰顏
隔牖風驚竹開門雪滿山
灑空深巷靜積素廣庭閒
借問袁安舍儵然尚閉關

登裴秀才迪小臺

端居不出戶滿目望雲山
落日鳥邊下秋原人外閑
遙知遠林際不見此檐閒
好客多乘月應門莫上關

酬虞部蘇員外過藍田別業不見留之作

貧居依谷口喬木帶荒村石路枉迴駕山家誰候門
漁舟膠凍浦獵火燒寒原惟有白雲外疏鐘聞夜蟬
喜祖三至留宿

門前洛陽客下馬拂征衣不枉故人駕平生多掩扉
行人返深巷積雪帶餘暉早歲同袍者高車何處歸

酬張少府

晚年惟好靜萬事不關心自顧無長策空知返舊林
松風吹解帶山月照彈琴君問窮通理漁歌入浦深
寄荊州張丞相

所思竟何在悵望深荆門舉世無相識終身思舊恩
方將與農圃藝植老邱園目盡南無鴈何由寄一言
同崔員外秋宵寓直

建禮高秋夜承明候曉過九門寒漏徹萬井曙鐘多

月迴藏珠斗雲銷出絳河更慚衰朽質南陌共鳴珂
送岐王過楊氏別業應教

楊子談經處淮王載酒過興闌啼鳥緩坐久落花多
逕轉迴銀燭林開散玉珂嚴城時未啓前路擁笙歌
奉和聖製幸玉真公主山莊因題石壁十韻之

作應制

元宗乃欲以玉真降張果
必其夙與道流往來者

碧落風煙外瑤臺道路賒如何連帝苑別自有仙家
比地回鑿駕緣谿轉翠華洞中開日月窗裏發雲霞
庭養衝天鶴谿留上漢查種田生白玉泥竈化丹砂
谷靜泉逾響山深日易斜御羹和石髓香飯進胡麻
大道今無外長生詎有涯還瞻九霄上來往五雲車
奉和聖製暮春送朝集使歸郡應制

萬國仰宗周衣冠拜冕旒玉乘迎大客金節送諸侯

祖席傾三省，褰帷向九州。
楊花飛上路，槐色蔭通溝。
來預鈞天樂，歸分漢主憂。
宸章類河漢，垂象滿中州。

重州字

奉和聖製重陽節宰臣及羣官上壽應制

四海方無事，三秋大有年。
百生逢此日，萬壽願齊天。
芍藥和金鼎，茱萸插玳筵。
玉堂開右个，天樂動宮懸。
御柳疏秋景，城雅拂曙煙。
無窮菊花節，長奉柏梁篇。

曉行巴峽

際曉投巴峽，餘春憶帝京。
晴江一女浣，朝日衆禽鳴。
水國舟中市，山橋樹杪行。
登高萬井出，眺迥二流明。
人作殊方語，鸞爲舊國聲。
賴諳山水趣，稍解別離情。

送祕書鼂監還日本國

積水不可極，安知滄海東。
九州何處遠，萬里若乘空。

向國惟看日歸帆，但信風鼇身映天。
黑魚眼射波紅，鄉樹扶桑外，主人孤島中。
別離方異域，音信若爲通。

奇警
稱題

送李太守任上洛

商山包楚鄧，積翠靄沈沈。
驛路飛泉灑，關門落照深。
野花開古戍，行客響空林。
板屋春多雨，山城晝欲陰。
丹泉通號略，白羽抵荆岑。
若見西山爽，應知黃綺心。

過沈居士山居哭之

楊朱來此哭，桑扈返於真。
獨自成千古，依然舊四鄰。
閒檐喧鳥雀，故榻滿埃塵。
曙月孤鷺轉，空山五柳春。
野花愁對客，泉水咽迎人。
善卷明時隱，黔婁在日貧。
逝川嗟爾命，邱井歎吾身。
前後徒言隔，相悲詎幾晨。

孟浩然二十六首

孟公高華精警不逮右丞
而自然奇逸處則過之

萬山潭作

垂釣坐磐石水清心亦閒
魚行潭樹下蟻挂壘藤閒
游女昔解佩傳聞於此山
求之不可得沿月權歌還

空逸
澹宕

晚泊潯陽望廬山

挂席幾千里名山都未逢
泊舟潯陽郭始見香鑪峯
嘗讀遠公傳永懷塵外蹤
東林精舍近日暮坐聞鐘

與諸子登峴山作

人事有代謝往來成古今
江山留勝跡我輩復登臨
水落魚梁淺天寒夢澤深
羊公碑尚在讀罷淚沾襟

歲暮歸南山

北闕休上書南山歸敝廬
不才明主棄多病故人疏
白髮催年老青陽逼歲除
永懷愁不寐松月夜窗虛

尋天台山

吾友太乙子餐霞臥赤城欲尋華頂去不憚惡谿名
歇馬憑雲宿揚帆截海行高高翠微裏遙見石梁橫
宿武陽卽事

川暗夕陽盡孤舟泊岸初嶺蟻相叫嘯潭影似空虛
就枕滅明燭扣舷聞夜漁雞鳴問何處人物是秦餘
武陵泛舟

武陵川路狹前權入花林莫測幽源裏仙家信幾深
水迴青嶂合雲度綠谿陰坐聽閒蟻嘯彌清塵外心
舟中曉望

挂席東南望青山水國遙舳艫爭利涉來往接風潮
問我今何適天台訪石橋坐看霞色曉疑是赤城標

趣興
奇逸

望洞庭湖贈張丞相

八月湖水平涵虛混太清
氣蒸雲夢澤波撼岳陽城
欲濟無舟楫端居恥聖明
坐觀垂釣者徒有羨魚情

宿揚子津寄長山劉隱士

所思在建業欲往大江深
日夕望京口煙波愁我心
心馳茅山洞目極楓樹林
不見少微隱星霜勞夜吟

宿永嘉江寄山陰崔少府國輔

我行窮水國君使入京華
相去日千里孤帆天一涯
臥聞海潮至起視江月斜
借問同舟客何時到永嘉

宿桐廬江寄廣陵舊游

山暝聽猿愁滄江急夜流
風鳴兩岸葉月照一孤舟
建德非吾土維揚憶舊游
還將兩行淚遙寄海西頭

澗南卽事貽皎上人

傲廬在郭外素產惟田園左右林野曠不聞朝市喧
釣竿垂北澗樵唱入南軒書取幽棲事將尋靜者論

九日懷襄陽

去國似如昨倏然經杪秋峴山不可見風景令人愁
誰采籬下菊應閒池上樓宜城多美酒歸與葛強游
早寒江上有懷

木落鴈南渡北風江上寒我家襄水曲遙隔楚雲端
鄉淚客中盡孤帆天際看迷津欲有問平海夕漫漫
廣陵別薛八

士有不得志棲棲吳楚間廣陵相遇罷彭蠡泛舟還
檣出江中樹波連海上山風帆明日遠何處更追攀

奇氣

送張子容赴舉

夕曛山照滅送客出柴門惆悵野中別殷勤醉後言
茂林余偃息喬木爾飛翻無使谷風誚須令友道存

真朴

永嘉上浦館逢張八子容

逆旅相逢處江村日暮時衆山遙對酒孤嶼共題詩
廡宇鄰鮫室人煙接鳥夷鄉園萬餘里失路一相悲
游精思觀迴王白雲在後

出谷未亭午至家日已曛迴瞻下山路但見牛羊羣
樵子暗相失草蟲寒不聞衡門猶未掩佇立望夫君
夜泊牛渚趁薛八船不及

星羅牛渚夕風退鷁舟遲浦澈嘗同宿煙波勿閒之
榜歌空裏失船火望中疑明發泛湖海茫茫何處期
裴司士員司戶見過

府僚能枉駕家醞復新開落日池上酌清風松下來
廚人具雞黍稚子摘楊梅誰道山公醉猶能騎馬迴
過故人莊

故人具雞黍邀我至田家綠樹村邊合青山郭外斜
開軒面場圃把酒話桑麻待到重陽日還來就菊花
題大禹寺義公山房

義公習禪處結宇依空林戶外一峯秀階前衆壑深
夕陽連雨足空翠落庭陰看取蓮花淨方知不染心
傷峴山雲表上人

少小學書劍秦吳多歲年歸來一登眺陵谷尚依然
豈意餐霞客忽隨朝露先因之問閭里把臂幾人全
聽鄭五彈琴

阮籍推名飲清風滿竹林半酣下衫袖拂拭龍脣琴

一桮彈一曲不覺夕陽沈予意在山水聞之諧夙心
西山尋辛諤

漾舟乘水便因訪故人居落日清川裏誰言獨羨魚
石潭窺洞徹沙岸歷紆餘竹嶼見垂釣茅齋聞讀書
款言忘景夕清興屬涼初回也一瓢飲賢哉常宴如

五言今體詩鈔卷第二

五言今體詩鈔卷第二

常建二首

宿王昌齡隱居

清谿深不測，隱處惟孤雲。
松際露微月，清光猶爲君。
茅亭宿花影，藥院滋苔紋。
余亦謝時去，西山鸞鶴羣。

題破山寺後院

清晨入古寺，初日照高林。
曲徑通幽處，禪房花木深。
山光悅鳥性，潭影空人心。
萬籟此俱寂，但餘鐘磬音。

劉昫虛二首

闕題

道由白雲盡，春與青谿長。
時有落花至，遠隨流水香。
閑門向山路，深柳讀書堂。
幽映每白日，清輝照衣裳。

寄江滔求孟六遺文

南望襄陽路思君情轉親偏知漢水廣應與孟家鄰
在日貧爲善昨來聞更貧相如有遺草一爲問家人

沈轉一氣此是唐人之古詩十九首也漢水二句亦所云兼復故實者也

儲光義四首

寒夜江口泊舟

寒潮信未起山浦纜孤舟一夜苦風浪自然增旅愁
吳山遲海月楚火照江流欲有知音者異鄉誰可求

似孟公

題陸山人樓

暮聲雜初鴈夜色涵早秋獨見海中月照君池上樓
山雲拂高棟天漢入檐流不惜朝光滿其如千里游

檐一作雲

霽後貽馬十二翼

高天風雨散清氣在園林況我夜初靜當軒鳴綠琴
雲開北堂月庭滿南山陰不見長裾者空歌游子吟
尋徐山人遇馬舍人

泊舟伊川右正見野人歸日暮春山綠我心清且微
巖聲風雨度水氣雲霞飛復有金門客來參蘿薜衣
祖詠六首

長樂驛留別盧象裴總

朝來已握手宿別更傷心灞水行人渡商山驛路深
故情君且足謫宦我難任直道皆如此誰能淚滿襟
蘇氏別業

別業居幽處到來生隱心南山當戶牖灋水在園林
竹覆經冬雪庭昏未夕陰寥寥人境外閒坐聽春禽
題韓少府水亭

梅福幽棲處佳期不忘還鳥啼當戶竹花遶傍池山水氣侵階冷藤陰覆坐閒寧知武陵趣宛在市朝閒

江南旅情

楚山不可極歸路但蕭條海色晴看雨江聲夜聽潮
劍留南斗近書寄北風遙爲報空潭橘無媒寄維橋
家園夜坐寄郭微

前階微雨歇開戶散窺林月出夜方淺水涼池更深
餘風生竹樹清露滿衣襟遇物遂遙歎懷人滋遠心
依稀成夢想影響絕徽音誰念窮居者明時嗟陸沈
清明宴司勳劉郎中別業

田家復近臣行樂不違親霽日園林好清明煙火新
以文常會友惟德自成鄰池照窗陰晚栢香藥味春
欄前花覆地竹外鳥窺人何必桃源裏深居作隱淪

綦母季通二首

題靈隱寺山頂禪院

招提此山頂下界不相聞塔影挂清漢鐘聲扣白雲
觀空淨室掩行道衆香焚且駐西來駕人天日未曛

題招隱寺絢公房

開士度人久空巖花霧深徒知燕坐處不見有爲心
蘭若門對壑田家路隔林還言證法性歸去比黃金

若耶谿逢孔九

相逢此谿曲勝託在煙霞潭影竹閒動巖陰檐外斜
人言上皇代犬吠武陵家借問淹留日春風滿若耶

似孟公

王少伯二首

客廣陵

題有誤當是在丹徒寄人客廣陵者

樓頭廣陵近九月在南徐秋色明海縣寒煙生里閭
夜帆歸楚客昨日渡江書爲問易名叟垂綸不羨魚
宿京江口期劉沓虛不至

霜天起長望殘月生海門風靜夜潮滿城高寒氣昏
故人何寂寞久已乖清言明發不能寐徒盈江上尊
送李擢歸江東

清洛日夜漲微風引孤舟離觴便千里遠夢生江樓
楚國橙橘暗吳門煙雨愁東南具今古歸望山雲秋
邱爲二首

題農舍

東風何時至已綠湖上山湖上春旣早田家日不閑
溝塍流水處耒耜平蕪閒薄暮飯牛罷歸來還閉關

似右丞

登潤州城

天末江城晚登臨客望迷春潮平島嶼殘雨隔虹霓
鳥與孤帆遠煙和獨樹低鄉山何處是目斷廣陵西

李頎七首

望秦川

秦川朝望迥日出正東峯遠近山河淨逶迤城闕重
秋聲萬戶竹寒色五陵松客有歸與歎淒其霜露濃

留別王盧二拾遺

此別不可道此心當報誰春風灞水上飲馬桃花時
誤作好文士只今遊宦遲留書下朝客我有故山期

送盧逸人

洛陽爲此別攜手更何時不復人間見祇應海上期
清谿入雲木白首臥茅茨共惜盧敖去天邊望所思

送人歸沔南

梅花今正發，失路復何如。
舊國雲山在，新年風景餘。
春饒漢陽夢，日寄武陵書。
可卽明時隱，臨川莫羨魚。

寄鏡湖朱處士

澄霽晚流闊，微風吹綠蘋。
鱗鱗遠峯見，淡淡平湖春。
芳草日堪把，白雲心所親。
何時可爲樂，夢裏東山人。

宿香山寺石樓

夜宿翠微半，高樓聞暗泉。
漁舟帶微火，山磬發孤煙。
衣拂松雲外，門清河漢邊。
峯巒低枕席，世界接人天。
靄靄花蒙霧，輝輝星映川。
東林曙鶯滿，惆悵欲言旋。

送盧少府赴延陵

聞君從宦所，何日府中趨。
遙指金陵縣，青山天一隅。
行人懷寸祿，小吏獻新圖。
北固波濤險，南天風俗殊。

春江連橘柚晚景媚菰蒲漠漠花生渚亭亭雲過湖
灘沙映春火水霧斂檣鳥回首東門路鄉書不可無
崔顥三首

題沈隱侯八詠樓

梁日東陽守爲樓望越中綠窗明月在青史古人空
江靜聞山狄川長數塞鴻登臨白雲晚流恨此遺風
此詩已似錢劉

送單于裴都護赴西河

征馬去翩翩城秋月正圓單于莫近塞都護欲臨邊
漢驛通煙火胡沙乏井泉功成須獻捷未必去經年
遼西作

燕郊芳歲晚殘雪凍邊城四月青草合遼陽春水生
胡人正牧馬漢將日徵兵露重寶刀溼沙虛金鼓鳴

寒衣暮已盡春服與誰成寄語洛陽使爲傳邊塞情

崔國輔二首

宿法華寺

松雨時復滴寺門清且涼此心竟誰證回憩支公牀
壁畫感靈迹龕經傳異香獨遊寄象外忽忽歸南昌

杭州北郭戴氏荷池送侯愉

秋近萬物肅況當臨水時折花贈歸客離緒斷荷絲
誰謂江國永故人感在茲道存過北郭情極望東菑
喬木故國意鳴蟬窮巷悲扁舟竟何待中路每遲遲

李嶷一首

林園秋夜作

林臥遊殘暑白雲長在天賞心旣如此對酒非徒然
月色徧秋露竹聲兼夜泉涼風懷袖裏茲意與誰傳

岑參十六首

送杜位下第歸陸渾別業

位一作佐

正月今欲半陸渾花未開出關見青草春色正東來
夫子且歸去明時方愛才還須及秋賦莫卽隱蒿萊

送張子尉南海

不擇南州尉高堂有老親樓臺重蜃氣邑里雜鮫人
海暗三山雨花明五嶺春此鄉多寶玉慎莫厭清貧
澧頭送蔣侯

君住澧水北我家澧水西兩村辨喬木五里聞鳴雞
飲酒谿雨過彈琴山月低徒開蔣生徑爾去誰相攜
送鄭堪歸東京汜水別業

客舍見春草忽聞思舊山看君灞陵去匹馬成臯還
對酒風與雪向家河復關因悲宦遊子終歲無時閑

滹水東店送唐子歸嵩陽

野店臨官路重城壓御隄山開灞水北雨過杜陵西
歸夢秋能作鄉書醉癩題橋回忽不見征馬尚聞嘶

送王七錄事赴虢州

早歲卽相知嗟君最後時青雲仍未達白髮欲成絲
小店關門樹長河華嶽祠宏農人吏待莫使馬行遲

送張都尉東歸

白羽綠弓弦年年只在邊還家劍鋒盡出塞馬蹄穿
逐虜西逾海平胡北到天封侯應不遠燕領豈徒然

陝州月城樓送辛判官入奏

送客飛鳥外城頭樓最高尊前遇風雨窗裏動波濤
謁帝向金殿隨身惟寶刀相思灞陵月祇有夢偏勞

還高冠潭留別舍弟

昨日山有信祇今耕種時遙傳杜陵叟怪我還山遲
獨向潭上酌無人林下棋東谿憶汝處閒臥對鷗鷺

終南東谿中作

谿水碧如草潺潺花底流沙平堪濯足石淺不勝舟
洗藥朝與暮釣魚春復秋興來從所適還欲向滄洲

題永樂韋少府廳壁

大河南郭外終日氣昏昏白鳥下公府青山當縣門
故人是邑尉過客駐征軒不憚煙波闊思君一笑言

三四勝太白山
鳥下廳專一聯

漢上題韋氏莊

結茅當楚客卜築漢江邊日落數歸鳥夜深聞扣舷
水痕侵岸柳山翠借厨煙調笑提筐婦春來蠶幾眠

初至犍爲作

山色軒楹內，灘聲枕席閒。草生公府靜，花落訟庭閑。
雲雨連三峽，風塵接百蠻。到來能幾日，不覺鬢毛斑。
巴南舟中書事

渡口欲黃昏，歸人爭渡喧。近鐘清野寺，遠火點江村。
見鴈思鄉信，聞蟻積淚痕。孤舟萬里外，秋月不堪論。
早秋與諸子登虢州西亭觀眺

亭高出鳥外，客到與雲齊。樹點千家小，天圍萬嶺低。
殘虹挂陝北，急雨過關西。酒榼緣青壁，瓜田傍碧谿。
微官何足道，愛客且相攜。惟有鄉園處，依依望不迷。

六月二十日水亭送華陰王少府還縣

得潭字

亭晚人將別，池涼酒未酣。關門勞夕夢，仙掌引歸驂。
荷葉藏魚艇，藤花罨客簷。

六月豈有藤花必字誤

殘雲收夏暑

新雨帶秋嵐，失路情無適。離懷思不堪，賴茲庭戶裏。

別有小江潭

高達夫六首

酬衛八雪中見寄

季冬憶淇上落日歸山樊舊宅帶流水平田臨古村
雪中望來信醉裏開衡門果得希代寶緘之那可論
途中寄徐錄事

落日風雨至秋天鴻鴈初離憂不堪比旅館復何如
君又幾時至我知音信疏空多篋中贈長見右軍書
送馮判官

碣石遼西地漁陽薊北天關山惟一道雨雪盡二邊
才子方爲客將軍正渴賢遙知幕府下書記日翩翩
自薊北歸

驅馬薊門北北風邊馬哀蒼茫遠山口豁達胡天開

五將已深入前軍止半迴誰憐不得意長劍獨歸來
送柴司戶充劉卿判官之嶺外

嶺外資雄鎮朝端寵節旄月卿臨幕府星使出詞曹
海對羊城關山連象郡高風霜驅瘴癘忠信涉波濤
別恨隨流水交情脫寶刀有才無不適行矣莫徒勞
陪寶侍御泛靈雲池

白露先時降清川思不窮江湖仍塞上舟楫在軍中
舞換臨津樹歌饒向曉風夕陽連積水邊色滿秋空
乘興宜投轄邀歡莫避驄誰憐持弱羽猶欲伴鷓鴣
蕭茂挺一首

越江秋曙

扁舟東路遠曉月下江濱瀟灑信潮上蒼茫孤嶼分
林□寒動葉水氣曙連雲暝日浪中出榜歌天際聞


伯鸞常□國安道惜離羣延首剡谿近詠言懷數君

王灣一首

北固山下作

客路青山外行舟綠水前潮平兩岸闊風正一帆懸
海日生殘夜江春入舊年鄉書何處達歸鴈洛陽邊

五言今體詩鈔卷第三



前修景□國英前前離華英首以模改精言更後昏

五言今體詩鈔卷第四

李太白四十二首

塞下曲二首

五月天山雪無花祇有寒笛中間折柳春色未曾看
曉戰隨金鼓宵眠抱玉鞍願將腰下劍直爲斬樓蘭
駿馬似風颺鳴鞭出渭橋彎弓辭漢月插羽破天驕
陣解星芒盡營空海霧銷功成畫麟閣獨有霍嫫媯
塞虜乘秋下天兵出漢家將軍分虎竹戰士臥龍沙
邊月隨弓影胡霜拂劍花玉關殊未入少婦莫長嗟

秋思

燕支黃葉落妾望自登臺海上白雲斷單于秋色來
胡兵沙塞合漢使玉關迴征客無歸日空悲蕙草催

宮中行樂詞五首

小小生金屋盈盈在紫微
山花插寶髻石竹繡羅衣
每出深宮裏常隨步輦歸
只愁歌舞散化作彩雲飛
柳色黃金嫩梨花白雪香
玉樓巢翡翠金殿鎖鴛鴦
選伎隨雕輦徵歌出洞房
宮中誰第一飛燕在昭陽
盧橘爲秦樹蒲萄出漢宮
煙花宜落日絲管醉春風
笛奏龍吟水簫鳴鳳下
空君王多樂事還與萬方同
繡戶香風暖紗窗曙色新
宮花爭笑日池草暗生春
綠樹聞歌鳥青樓見舞人
昭陽桃李月羅綺自相親
水綠南薰殿花紅北闕樓
鶯歌聞太液鳳吹遶瀛洲
素女鳴珠珮天人弄綵毬
今朝風日好宜入未央游

侍從游宿溫泉作

羽林十二將羅列應星文
霜仗縣秋月霓旌卷夜雲
巖更千戶肅清樂九天聞
日出瞻佳氣蔥蔥遶聖君

夜泊牛渚懷古

此地卽謝尚聞袁宏詠史處

牛渚西江夜青天無片雲登舟望秋月空憶謝將軍
余亦能高詠斯人不可聞明朝挂帆去楓葉落紛紛

秋登宣城謝朓北樓

江城如畫裏山曉望晴空
雨水夾明鏡雙橋落彩虹
人煙寒橘柚秋色老梧桐
誰念北樓上臨風懷謝公

謝公亭

自注蓋謝朓范雲之所游

謝公離別處風景每生愁
客散青天月山空碧水流
池花春映日窗竹夜鳴秋
今古一相接長歌懷舊游

金陵二首

地擁金陵勢城迴江水流
當時百萬戶夾道起朱樓
亡國生春草王宮沒古邱
空餘後湖月波上對江洲
六代興亡國三楮爲爾歌
施方秦地少山似洛陽多

古殿吳花草深宮晉綺羅併隨人事滅東逝與滄波

太原早秋

歲落衆芳歇時當大火流霜威出塞早雲色渡河秋
夢遶邊城月心飛故國樓思歸若汾水無日不悠悠

宿五松山下荀媪家

我宿五松下寂寥無所歡田家秋作苦鄰女夜春寒
跪進雕胡酒月光明素盤令人慚漂母三謝不能餐

江夏別宋之悌

楚水清若空遙將碧海通人分千里外影在一杯中
谷鳥吟晴日江蟻嘯晚風平生不下淚於此泣無窮

南陽送客

斗酒勿爲薄寸心終不忘坐惜故人去偏令游子傷
離顏怨芳草春思結垂楊揮手再三別臨岐空斷腸

送友人

青山橫北郭，白水遶東城。此地一爲別，孤蓬萬里征。
浮雲游子意，落日故人情。揮手自茲去，蕭蕭班馬鳴。

送友人入蜀

見說蠶叢路崎嶇，不易行。山從人面起，雲傍馬頭生。
芳樹籠秦棧，春流遶蜀城。升沈應已定，不必問君平。
送白利登從金吾董將軍西征

西羌延國討，白起佐軍威。劍決浮雲氣，弓彎明月輝。
馬行邊草綠，旗卷曙霜飛。抗手凜相顧，寒風生鐵衣。
渡荆門送別

渡遠荆門外，來從楚國游。山隨平野盡，江入大荒流。
月下飛天鏡，雲生結海樓。仍憐故鄉水，萬里送行舟。
廣陵送別

玉瓶沽美酒數里送君還繫馬垂楊下銜杯大道閒
天邊看綠水海上見青山興罷各分袂何須慘別顏
送張舍人之江東

張翰江東去正值秋風時天清一鴈遠海闊孤帆遲
白日行欲暮滄波杳難期吳洲如見月千里幸相思
留別龔處士

龔子棲閒地都無人世喧柳深陶令宅竹暗辟疆園
我去黃牛峽遙愁白帝猿贈君卷薤草心斷竟何言
贈孟浩然

吾愛孟夫子風流天下聞紅顏棄軒冕白首臥松雲
醉月頻中聖迷花不事君高山安可仰徒此挹清芬
贈崔秋浦

吾愛崔秋浦宛然陶令風門前五楊柳井上一二梧桐

山鳥下廳事檐花落酒中懷君未忍去惆悵意無窮
贈錢徵君少陽

白玉一杯酒綠楊三月時春風餘幾日兩鬢各成絲
秉燭惟須飲投竿也未遲如逢渭川獵猶可帝王師
口號贈盧徵君鴻

陶令辭彭澤梁鴻入會稽我尋高士傳君與古人齊
雲臥留丹壑天書降紫泥不知楊伯起早晚向關西
秋夜與劉碭山泛宴喜池亭

明宰試舟楫張鐙宴華池文招梁苑客歌動郢中兒
月色望不盡空天交相宜令人欲泛海只待長風吹
過崔八丈水亭

高閣橫秀氣清幽併在君檐飛宛谿水窗落敬亭雲
蟻嘯風中斷漁歌月裏聞閒隨白鷗去沙上自爲羣

對酒醉題屈突明府廳

陶令八十日長歌歸去來故人建昌宰借問幾時回
風落吳江雪紛紛入酒榼山翁今已醉舞袖爲君開
訪戴天山道士不遇

犬吠水聲中桃花帶雨濃樹深時見鹿谿午不聞鐘
野竹分青靄飛泉挂碧峯無人知所去愁倚兩三松
寄從弟宣州長史昭

爾佐宣城郡守官清且閒常誇雲月好邀我敬亭山
五落洞庭葉三江遊未還相思不可見歎息損朱顏
聽胡人吹笛

胡人吹玉笛一半是秦聲十月吳山曉梅花落敬亭
愁聞出塞曲淚滿逐逐臣纓卻望長安道空懷戀主情
聽蜀僧濬彈琴

蜀僧抱綠綺西下峨眉峯爲我一揮手如聽萬壑松
客心洗流水餘響入霜鐘不覺碧山暮秋雲暗幾重

東關山月

明月出天山蒼茫雲海閒長風幾萬里吹度玉門關
漢下白登道胡窺青海灣由來征戰地不見有人還
戍客望邊邑思歸多苦顏高樓當此夜歎息未應閒

秋日與張少府楚城韋公藏書高齋作

日下空庭暮城荒古迹餘地形連海盡天影落江虛
舊賞人雖隔新知樂未疏彩雲思作賦丹壁問藏書
查擁隨流葉萍開出水魚夕來秋興滿回首意何如
中丞宋公以吳兵三千赴河南軍次尋陽脫余
之囚參謀幕府因贈之

獨坐清天下專征出海隅九江皆渡虎三郡盡還珠

組練明秋浦樓船入郢都風高初選將月滿欲平胡
殺氣橫千里軍聲動九區白蟻慚劍術黃石借兵符
戎虜行當翦鯨鯢立可誅自慚非劇孟何以佐良圖

送儲邕之武昌

黃鶴西樓月長江萬里情春風三十度空憶武昌城
送爾難爲別銜梧惜未傾湖連張樂地山逐泛舟行
諾謂楚人重詩傳謝朓清滄浪吾有曲寄入櫂歌聲

西一作高

送友人尋越中山水

聞道稽山去偏宜謝客才千巖泉灑落萬壑樹縈迴
東海橫秦望西陵遶越臺湖清霜鏡曉濤白雪山來
八月枚乘筆三吳張翰梧此中多逸興早晚向天台
五言今體詩鈔卷第四

五言今體詩鈔卷第五

杜子美上百二十三首

春宿左省

花隱掖垣暮啾啾棲鳥過
星臨萬戶動月傍九霄多
不寢聽金鑰因風想玉珂
明朝有封事數問夜如何

喜達行在所

西憶岐陽信無人遂卻回
眼穿當落日心死著寒灰
霧樹行相引蓮峯望或開
所親驚老瘦辛苦賊中來
愁思胡笳夕淒涼漢苑春
生還今日事閒道暫時人
司隸章初覩南陽氣已新
喜心翻倒極嗚咽淚沾巾
死去憑誰報歸來始自憐
猶瞻太白雪喜遇武功天
影靜千官裏心蘇七校前
今朝漢社稷新數中興年

收京

三首
錄一

漢馬收宮闕春城鏜賊壕賞應歌杖社歸及薦櫻桃
雜虜橫戈數功臣甲第高萬方頻送喜無乃聖躬勞

觀西安兵過赴關中待命

二首
錄一

奇兵不在衆萬馬救中原談笑無河北心肝奉至尊
孤雲隨殺氣飛鳥避轅門竟日留歡宴城池未覺喧

西山二首

夷界荒山頂蕃州積雪邊築城依白帝轉粟上青天
蜀將分旗鼓羌兵助鎧鉞西南背和好殺氣日相纏
辛苦三城戍長防萬里秋煙塵侵火井雨雪閉松州
風動將軍幕天寒使者裘漫山賊營壘迴首得無憂

遣憂

亂離知又甚消息苦難真受諫無今日臨危憶古人
紛紛乘白馬攘攘著黃巾隋氏留宮室焚燒何太頻

洞房

洞房環珮冷玉殿起秋風秦地應新月龍池滿舊宮
繫舟今夜遠清漏往時同萬里黃山北園陵白露中

宿昔

宿昔青門裏蓬萊仗數移花嬌迎雜樹龍喜出平池
落日留王母微風倚少兒宮中行樂祕少有外人知

歷歷

歷歷開元事分明在眼前無端賊盜起忽已歲時遷
巫峽西山外秦城北斗邊爲郎從白首臥病數秋天
登兗州城樓

東郡趨庭日南樓縱目初浮雲連海岱平野入青徐
孤嶂秦碑在荒城魯殿餘從來多古意臨眺獨躊躇

禹廟

禹廟空山裏秋風落日斜荒庭垂橘柚古屋畫龍蛇
雲氣生虛壁江聲走白沙早知乘四載疏鑿控三巴

公安縣懷古

野曠呂蒙營江深劉備城寒天催日短風浪與雲平
灑落君臣契飛騰戰伐名維舟望前浦長嘯一含情

滕王亭子

寂寞春山路君王不復行古牆猶竹色虛閣自松聲
鳥雀荒村暮雲霞過客情尚思歌吹入千騎把霓旌

玉臺觀

玉臺觀必滕王因翁主造者故云簫史七言一首又有羸女烏鵲之句

浩劫因王造平臺訪古遊綵雲簫史駐文字魯恭留
宮闕通羣帝乾坤到十洲人傳有笙鶴時過北山頭

題元武禪師屋壁

何年顧虎頭滿壁畫滄洲赤日石林氣青天江海流

錫飛常近鶴，枯渡不驚鷗。似得廬山路，真隨惠遠遊。
登岳陽樓

昔聞洞庭水，今上岳陽樓。吳楚東南坼，乾坤日夜浮。
親朋無一字，老病有孤舟。戎馬關山北，憑軒涕泗流。
泊岳陽城下

江國逾千里，山城僅百層。岸風翻夕浪，舟雪灑寒鐙。
留滯才難盡，艱危氣益增。圖南未可料，變化有鷗鵬。

宿白沙驛

自注湖南
初過五里

水宿仍餘照，人煙復此亭。驛邊沙舊白，湖外草新青。
萬象皆春氣，孤槎自客星。隨波無限好，的的近南溟。
泊松滋江亭

紗帽隨鷗鳥，扁舟繫此亭。江湖深更白，松竹遠還青。
一柱全應近，高唐莫再經。今宵南極外，甘作老人星。

移居公安山館

南國晝多霧北風天正寒
路危行木杪身遠宿雲端
山鬼吹鐙滅廚人語夜闌
雞鳴問前館世亂敢求安

瞿唐兩崖

三峽傳何處雙崖壯此門
入天猶石色穿水忽雲根
揉攬鬚髯古蛟龍窟宅尊
羲和冬馭近愁畏日車翻

灩澦堆

巨石水中央江寒出水長
沈牛咎雲雨如馬戒舟航
天意存傾覆神功接混茫
干戈連解纜行止憶垂堂

灩西寒望

水色含羣動朝光切太虛
年侵頻悵望興遠一蕭疏
暖挂時相學鷗行迥自如
瞿唐春欲至定卜灩西居

九日登梓州城

伊昔黃花酒如今白髮翁追歡筋力異望遠歲時同
弟妹悲歌裏朝廷醉眼中兵戈與關塞此日意無窮
去蜀

五載客蜀郡一年居梓州如何關塞阻轉作瀟湘游
萬事已黃髮殘生隨白鷗安危大臣在何必淚長流

秦州雜詩

二十首
錄四

滿目悲生事因人作遠遊遲迴度隴怯浩蕩及關愁
水落魚龍夜山空鳥鼠秋西征問烽火心折此淹留
莽莽萬重山孤城山谷閒無風雲出塞不夜月臨關
屬國歸何晚樓蘭斬未還煙塵一長望衰颯正摧顏
聞道尋源使從天此路回牽牛去幾許宛馬至今來
一望幽燕隔何時郡國開東征健兒盡羌笛暮吹哀
鳳林戈未息魚海路常難候火雲峯峻縣軍幕井乾

風連西極動月過北庭寒故老思飛將何時議築壇

送翰林張司馬南海勒碑

自注相國製文

冠冕通南極文章落上台詔從三殿去碑到百蠻開
野館濃花發春帆細雨來不知滄海上天遣幾時迴

奉濟驛重送嚴公四韻

遠送從此別青山空復情幾時楛重把昨夜月同行
列郡謳歌惜三朝出入榮江村獨歸處寂寞養殘生

江亭王闔州筵餞蕭遂州

離亭非舊國春色是他鄉老畏歌聲短愁從舞曲長
二天開寵餞五馬爛生光川路風煙接俱宜下鳳皇

贈韋贊善別

扶病送君發自憐猶不歸祇應盡客淚復作掩荆扉
江漢故人少音書從此稀往還二十載歲晚寸心違

送元二適江左

亂後今相見，秋深復遠行。
風塵爲客日，江漢送君情。
晉室丹陽尹，公孫白帝城。
經過自愛惜，取次莫論兵。

贈別鄭鍊赴襄陽

戎馬交馳際，柴門老病身。
把君詩過日，念此別驚神。
地闊峨眉晚，天高峴首春。
爲於耆舊內，試覓姓龐人。

贈別何邕

生死論交地，何由見一人。
悲君隨燕雀，薄宦走風塵。
縣谷元通漢，沱江不向秦。
五陵花滿眼，傳語故鄉春。

涪江泛舟送韋班歸京得山字

追餞同舟日，傷春一水閒。
飄零爲客久，衰老羨君還。
花雜重重樹，雲輕處處山。
天涯故人少，更益鬢毛班。

送韋郎司直歸成都

竄身來蜀地同病得韋郎天下兵戈滿江邊歲月長
別筵花欲暮春日鬢俱蒼爲問南谿竹抽梢合過牆

送遠

帶甲滿天地胡爲君遠行親朋盡一哭鞍馬去孤城
草木歲月晚關河霜雪清別離已近日因見古人情
贈高式顏

昔別是何處相逢皆老夫故人還寂寞削迹共艱虞
自失論文友空知賣酒壚平生飛動意見爾不能無

孟氏

孟氏好兄弟養親惟小園承顏胝手足坐客強盤飧
負米夕葵外讀書秋樹根卜鄰慚近舍訓子覺先門

天末懷李白

涼風起天末君子意如何鴻鴈幾時到江湖秋水多

文章憎命達，魑魅喜人過。應共冤魂語，投詩贈汨羅。

春日懷李白

白也詩無敵，飄然思不羣。清新庾開府，俊逸鮑參軍。
渭北春天樹，江東日暮雲。何時一尊酒，重與細論文。

不見

自注近無李白消息

不見李生久，佯狂真可哀。世人皆欲殺，吾意獨憐才。
敏捷詩千首，飄零酒一椀。匡山讀書處，頭白好歸來。

戲題寄上漢中王

羣盜無歸路，衰顏會遠方。尚憐詩警策，猶憶酒顛狂。
魯衛彌尊重，徐陳略喪亡。空餘枚叟在，應念早升堂。
奉簡高三十五使君

當代論才子，如公能幾人。驂騮開道路，鷹隼出風塵。
行色秋將晚，交情老更親。天涯喜相見，披豁對吾真。

宴楊戎州使君東樓

勝絕驚身老情忘發興奇座從歌伎密樂任主人爲
重碧拈春酒輕紅擘荔枝樓高欲愁思橫笛未休吹
夜宴左氏莊

風林纖月落衣露淨琴張暗水流花徑春星帶草堂
檢書燒燭短看劍引杯長詩罷聞吳詠扁舟意不忘
與任城許主簿游南池

秋水通溝洫城隅進小船晚涼看洗馬森木亂鳴蟬
菱熟經時雨蒲荒八月天晨朝降白露遙憶舊青氈
陪鄭廣文游何將軍山林二首

不識南塘路今知第五橋名園依綠水野竹上青霄
谷口舊相得濠梁同見招平生爲幽興未惜馬蹄遙
牀上書連屋階前樹拂雲將軍不好武稚子總能文

醒酒微風入聽詩靜夜分絺衣挂蘿薜涼月白紛紛
幽意忽不愜歸期無柰何出門流水住回首白雲多
自笑鐙前舞誰憐醉後歌祇應與朋好風雨亦來過
過南鄰朱山人水亭

相近竹參差相過人不知幽花欹滿樹小水細通池
歸客村非遠殘尊席更移看君多道氣從此數追隨
杜位宅守歲

守歲阿戎家椒盤已頌花盞簪喧懣馬列炬散林鴉
四十明朝過飛騰暮景斜誰能更拘束爛醉是生涯
過客相尋

窮老真無事江山已定居地幽忘盥櫛客至罷琴書
挂壁移筐果呼兒問煮魚時聞繫舟楫及此問吾廬
月夜憶舍弟

戍鼓斷人行邊秋一鴈聲露從今夜白月是故鄉明
有弟皆分散無家問死生寄書長不達況乃未休兵

憶弟

自注時歸在陸渾山莊

且喜河南定不問鄴城圍百戰今誰在二年望汝歸
故園花自發春日鳥還飛斷絕人煙久東西消息稀
得舍弟消息

近有平陰信遙憐舍弟存側身千里道寄食一家村
烽舉新酣戰啼垂舊血痕不知臨老日招得幾人魂
汝懦歸無計吾衰往未期浪傳烏鵲喜深負脊鴿詩
生理何顏面憂端且歲時兩京三十日雖在命如絲

喜觀卽到復題短篇

前有得舍弟觀書一篇

巫峽千山暗終南萬里春病中吾見弟書到汝爲人
竟答兒童問來經戰伐新泊船悲喜後款款話歸秦

第五弟豐獨在江左近三四載寂無消息覓使
寄此

聞汝依山寺杭州定越州風塵淹別日江漢失清秋
影著啼猿樹魂飄結蜃樓明年下春水東盡白雲求
舍弟占歸草堂檢校聊示此詩

久客應吾道相隨獨爾來熟知江路近頻爲草堂迴
鵝鴨宜常數柴扉莫亂開東林竹影薄臘月更須栽
故武衛將軍挽詞二首

嚴警當寒夜前軍落大星壯夫思敢決哀詔惜精靈
王者今無戰書生已勒銘封侯意疏闕編簡爲誰青
哀挽青門去新阡絳水遙路人紛雨泣天意颯風颺
部曲精仍銳匈奴氣不驕無由覩雄略大樹日蕭蕭
哭嚴僕射歸櫬

素幔隨流水歸舟返舊京老親如宿昔部曲異平生
風送蛟龍雨天長驃騎營一哀三峽暮遺後見君情

過故斛斯校書莊二首

自注老儒艱難病于庸蜀歎其沒後方授一官

此老已云沒鄰人嗟未休竟無宣室召徒有茂陵求
妻子寄他食園林非昔游空堂總帷在浙浙野風秋
燕入非傍舍鷗歸祇故池斷橋無復板臥柳自生枝
遂有山陽作多慚鮑叔知素交零落盡白首淚雙垂

別房太尉墓

他鄉復行役駐馬別孤墳近淚無乾土低空有斷雲
對棋陪謝傅把劍覓徐君惟見林花落鶯啼送客聞

春望

國破山河在城春草木深感時花濺淚恨別鳥驚心
烽火連三月家書抵萬金白頭搔更短渾欲不勝簪

曉望

白帝更聲盡陽臺曉色分
高峯上寒日疊嶺宿霾雲
地坼江帆隱天清木葉聞
荆扉對麋鹿應共爾爲羣

野望

清秋望不及迢遞起層陰
遠水兼天淨孤城隱霧深
葉稀風更落山迴日初沈
獨鶴歸何晚昏鴉已滿林

出郭

霜露晚淒淒高天逐望低
遠煙鹽井上斜景雪峯西
故國猶兵馬他鄉亦鼓鼙
江城今夜客還與舊鳥啼

西郊

時出碧雞坊西郊向草堂
市橋官柳細江路野梅香
傍架齊書帙看題減藥囊
無人覺來往疏懶意何長

客亭

秋窗猶曙色木落更天風日出寒山外江流宿霧中
聖朝無棄物老病已成翁多少殘生事飄零任轉蓬

江亭

坦腹江亭暖長吟野望時水流心不競雲在意俱遲
寂寂春將晚欣欣物自私故林歸未得排悶強裁詩

江上

江上日多雨蕭蕭荆楚秋高風下木葉永夜攬貂裘
勳業頻看鏡行藏獨倚樓時危思報主衰謝不能休

江漲

江發蠻夷漲山添雨雪流大聲吹地轉高浪蹴天浮
魚鼈爲人得蛟龍不自謀輕帆好去便吾道付滄洲

旅夜書懷

細柳微風岸危檣獨夜舟星垂平野闊月湧大江流

名豈文章著官應老病休飄飄何所似天地一沙鷗

江漢

江漢思歸客乾坤一腐儒片雲天共遠永夜月同孤
落日心猶壯秋風病欲蘇古來存老馬不必取長途

南征

春岸桃花水雲帆楓樹林偷生長避地適遠更霑襟
老病南征日君恩北望心百年歌自苦未見有知音

歸來

客裏有所適歸來知路難開門野鼠走散帙壁魚乾
洗杓開新醞低頭著小冠憑誰給麴蘖細酌老江干

水檻遣興

去郭軒楹敞無村眺望賒澄江平少岸幽樹晚多花
細雨魚兒出微風燕子斜城中十萬戶此地兩三家

樓上

天地空搔首頻抽白玉簪
皇輿三極北身事五湖南
戀闕勞肝肺論才媿杞柁
亂離難自救終是老湘潭

獨酌成詩

燈花何太喜酒綠正相親
醉裏從爲客詩成覺有神
兵戈猶在眼儒術豈謀身
苦被微官縛低頭媿野人

刈稻了詠懷

稻穫空雲水川平對石門
寒風疏草木旭日散雞豚
野哭初聞戰樵歌稍出村
無家問消息作客信乾坤

漫成二首

野水荒荒白春流泯泯清
渚蒲隨地有村徑逐門成
只作披衣慣常從漉酒生
眼邊無俗物多病也身輕
江皋已仲春花下復清晨
仰面貪看鳥回頭錯應人

讀書難字過對酒滿壺傾近識峨眉老知余懶是真

遺意

轉枝黃鳥近泛渚白鷗輕一徑野花落孤村春水生
衰年催釀黍細雨更移橙漸喜交游絕幽居不用名
遺懷

愁眼看霜露寒城菊自花天風隨斷柳客淚墮清笳
水淨樓陰直山昏塞日斜夜來歸鳥盡啼殺後棲鴉

遺興

干戈猶未定弟妹各何之拭淚霑襟血梳頭滿面絲
地卑荒野大天遠暮江遲衰疾那能久應無見汝期
可惜

花飛有底急老去願春遲可惜歡娛地都非少壯時
寬心應是酒遺興莫過詩此意陶潛解吾生後汝期

屏迹

晚起家何事無營地轉幽竹光團野色舍影漾江流
失學從兒懶長貧任婦愁百年渾得醉一月不梳頭

春日江村二首

農務村村急春流岸岸深乾坤萬里眼時序百年心
茅屋還堪賦桃源自可尋艱難昧生理飄泊到如今
迢遞來二蜀蹉跎又六年客身逢故舊發興自林泉
過懶從衣結頻游任履穿藩籬頗無限恣意向江天

寒食

寒食江村路風花高下飛汀煙輕冉冉竹日淨暉暉
田父要皆去鄰家問不違地偏相識盡雞犬亦忘歸

悲秋

涼風動萬里羣盜尚縱橫家遠傳書日秋來爲客情

愁窺高鳥過老逐衆人行始欲投三峽何由見兩京

朝

清旭楚宮南霜空萬嶺含野人時獨往雲木曉相參
俊鶻無聲過飢鳥下食貪病身終不動搖落任江潭

日暮

牛羊下來久各已閉柴門風月自清夜江山非故園
石泉流暗壁草露滴秋根頭白明燈裏何須花燼繁

薄暮

江水最深地山雲薄暮時寒花隱亂草宿鳥擇深枝
舊國見何日高秋心苦悲人生不再好鬢髮白如絲

向夕

畎畝孤城外江村亂水中深山催短景喬木易高風
鶴下雲汀近雞棲草屋同琴書散明燭長夜始堪終

夜

絕岸風威動寒房燭影微嶺猿霜外宿江鳥夜深飛
獨坐親雄劍哀歌歎短衣煙塵遶閩闔白首壯心違

中夜

中夜江山靜危樓望北辰長爲萬里客有媿百年身
故國風雲氣高堂戰伐塵胡雛負恩澤嗟爾太平人

中宵

西閣百尋餘中宵步綺疏飛星過水白落月動沙虛
擇木知幽鳥潛波想巨魚親朋滿天地兵甲少來書

倦夜

竹涼侵臥內野月滿庭隅重露成涓滴稀星乍有無
暗飛螢自照水宿鳥相呼萬事干戈裏空悲清夜徂

村夜

風色蕭蕭暮江頭，人不行村春雨外急鄰。火夜深明胡羯何多難，漁樵寄此生中原有兄弟。萬里正含情。

客夜

客睡何曾著，秋天不肯明。捲簾殘月影，高枕遠江聲。計拙無衣食，途窮仗友生。老妻書數紙，應悉未歸情。

返照

返照開巫峽，寒空半有無。已低魚腹暗，不盡白鹽孤。荻岸如秋水，松門似畫圖。牛羊識僮僕，旣夕應傳呼。

月夜

今夜鄜州月，閨中只獨看。遙憐小兒女，未解憶長安。香霧雲鬟濕，清輝玉臂寒。何時倚虛幌，雙照淚痕乾。

月

斷續巫山雨，天河此夜新。若無青嶂月，愁殺白頭人。

翹翹移深樹蝦蟆動半輪故園當北斗直想照西秦
月

四更山吐月殘夜水明樓塵匣元開鏡風簾自上鉤
兔應疑鶴髮蟾亦戀貂裘斟酌姮娥寡天寒柰九秋

江月

江月光如水高樓思殺人天邊長作客老去一霑巾
玉露團清影銀河沒半輪誰家挑錦字燭滅翠眉顰

雨

微雨不滑道斷雲疏復行紫崖奔處黑白鳥去邊明
秋日新霑影寒江舊落聲柴扉臨野碓半濕擣香秔

春夜喜雨

好雨知時節當春乃發生隨風潛入夜潤物細無聲
野徑雲俱黑江船火獨明曉看紅濕處花重錦官城

晴

久雨巫峽暗新晴錦繡文碧知湖外草紅見海東雲
竟日鶯相和摩霄鶴數羣野花乾更落風處急紛紛
螢火

幸因腐草出敢近太陽飛未足臨書卷時能點客衣
隨風隔幔小帶雨傍林微十月清霜重飄零何處歸

畫鷹

素練風霜起蒼鷹畫作殊攫身思狡兔側目似愁胡
條鏃光堪摘軒楹勢可呼何當擊凡鳥毛血灑平蕪

孤鴈

孤鴈不飲啄飛鳴聲念羣誰憐一片影相失萬重雲
望盡似猶見哀多如更聞野鴉無意緒鳴噪自紛紛

子規

峽裏雲安縣江樓翼瓦齊兩邊山木合終日子規啼
眇眇春風見蕭蕭夜色淒客愁那聽此故作傍人低

促織

促織甚微細哀音何動人草根吟不穩牀下夜相親
久客得無淚故妻難及晨悲絲與急管感激異天真

擣衣

亦知戍不返秋至試清砧已近苦寒月況經長別心
甯辭擣衣倦一寄塞垣深用盡閨中力君聽空外音

五言今體詩鈔卷第五

五言今體詩鈔卷第六

杜子美下三十七首

杜公長律有千門萬戶開闢陰陽之意元微之論李杜優

劣專主此體見雖少偏然不為無識自來學杜公者他體猶能近似長律則愈邈矣遺山云少

陵自有連城壁爭柰微之識杜公長律旁見此而目為玆玆此成何論耶

出無所不包而首尾一線尋其脈絡轉得清明他人指陳福隘而意緒或反不逮其整晰

夔府書懷四十韻

昔罷河西尉初興薊北師

起六韻自述生平進退不

才名位晚敢恨省郎遲屣聖崆峒日端居灑瀕時萍

流仍汲引樗散尚恩慈遂阻雲臺宿常懷湛露詩翠

華森遠矣白首颯淒其拙被林泉滯生逢酒賦欺文

園終寂寞漢閣自磷緇病隔君臣議慚紆德澤私揚

鑣驚主辱拔劍撥年衰以上自敘以下朝事社稷經綸地風雲

際會期血流紛在眼涕泗亂交頤四瀆樓船泛中原

鼓角悲賊城連白翟戰瓦落丹墀先帝嚴靈寢宗臣
切受遺恆山猶突騎遼海競張旗田父嗟膠漆行人
避蒺藜總戎存大體降將飾卑詞楚貢何年絕堯封
舊俗疑長吁翻北寇一望卷西夷不必陪元圃超然

待具茨凶兵鑄農器講殿闢書帷

此雖佳事而非時務于山所謂天子

方剛詩書定禮樂肅代好佛荒政略似梁武故子美云爾

廟算高難測天憂實在

茲形容真潦倒答效莫支持使者分王命

以下傷蜀中奉使者

之不

羣公各典司恐乖均賦斂不似問瘡痍萬里煩

供給孤城最怨思綠林寧小患雲夢欲難追卽事須

嘗膽蒼生可察眉議堂猶集鳳貞觀是元龜處處喧

飛檄家家急競雖蕭車安不定蜀使下何之釣瀨疏

墳籍

以下述所處情況

耕巖進弈棋地蒸餘破扇冬暖更織

絺豺溝哀登粲麟傷泣象尼衣冠迷適越藻繪憶游

睢賞月延秋桂傾陽逐露葵
大庭終返樸京觀且僵
尸高枕虛眠晝哀歌欲和誰
南宮載勳業凡百慎交
綏

敝廬遣興奉寄嚴公

野水平橋路春沙映竹村
風輕粉蝶喜花暖蜜蜂喧
把酒宜深酌題詩好細論
府中瞻暇日江上憶詞源
迹忝朝廷舊情依節制尊
還思長者轍恐避席爲門
遣興

驥子好男兒前年學語時
問知人客姓誦得老夫詩
世亂憐渠小家貧仰母慈
鹿門攜有處烏道去無期
天地軍麾滿山河戰角悲
儻歸免相失見日敢辭遲

北風

春生南國瘴氣待北風
蘇向晚霾殘日初宵鼓大鑪

爽攜卑溼地聲拔洞庭湖萬里魚龍伏三更鳥獸呼
滌除貪破浪愁絕付摧枯執熱沈沈在陵寒往往須
且知寬疾肺不敢恨危塗再宿煩舟子衰容問僕夫
今晨非盛怒便道卽長驅隱几看帆席雲山湧坐隅

太歲日

楚岸行將老巫山坐復春病多猶是客謀拙竟何人
閶闔開黃道衣冠拜紫宸榮光縣日月賜與出金銀
愁寂鷓鴣行斷參差虎穴鄰西江元下蜀北斗故臨秦
散地逾高枕生涯脫要津天邊梅柳樹相見幾回新
大歷三年春白帝城放船出瞿塘峽久居夔府
將適江陵漂泊有詩凡四十二韻

老向巴人裏今辭楚塞隅入舟翻不樂解纜獨長吁
窄轉深唬狖以下十二韻賦峽中虛隨亂浴鳧石苔陵几杖空

翠撲肌膚疊壁排霜劍奔泉濺水珠杳冥藤上下濃

淡樹榮枯神女峯娟妙昭君宅有無曲留明怨惜夢

盡失歡娛上下寫峽中險急卻入此二韻意態甚閒此爲神妙擺闔盤渦沸欵

斜激浪輪風雷纏地脈冰雪曜天衢鹿角真趨險狼

頭似跋胡自注鹿角狼頭二灘名惡灘甯變色高臥負微軀書

史全傾撓裝囊半壓濡生涯臨臬兀死地脫斯須不

有平川決以下十韻賦出峽後焉知衆壑趨乾坤靈漲海雨露

洗春蕪鷗鳥牽絲颺驪龍濯錦紆落霞沈綠綺殘月

壞金樞泥筍苞初荻沙茸出小蒲鴈兒爭水馬燕子

逐檣烏絕島容煙霧環洲納曉晡前聞辯陶牧轉盼

拂宜都縣郭南畿好津亭北望孤勞心依憩息朗詠

劃昭蘇意遣樂還笑以下十韻自慨衰迷賢與愚飄蕭將素

髮汨沒聽洪鑪邱壑曾忘返文章敢自誣此生遭聖

代誰分哭窮途臥病淹爲客蒙恩早廁儒廷爭酬造

化樸直乞江湖灩澦險相迫承峽中滄浪深可逾承出峽

浮名尋已已懶計卻區區喜近天皇寺四句扇對先披古

畫圖自注此寺有晉王右軍書張僧繇畫孔子十哲形像應經帝子渚同泣舜

蒼梧此就重華而朝士兼戎服以下八韻君王按湛

盧旄頭初倣擾鶉首麗泥塗甲卒身雖貴書生道固

殊出塵皆野鶴歷塊匪轅駒伊呂終難降韓彭不易

呼世有伊呂其人不用則爲野鶴用之以濟艱難如歷塊耳雖有韓彭桀驚可以指麾呼之此書生道

固殊也無此書生故甲卒貴而韓彭彭五雲高太甲六

跋扈矣此段仍公自比稷契之義

月曠搏扶回首黎元病爭權將帥誅山林託疲茶未

必免崎嶇雄警奇變長律至此上詞騷賦

秋日荆南述懷三十韻

昔承推獎分愧匪挺生才遲暮宮臣忝艱危衰職陪

揚鑣隨日馭折檻出雲臺罪戾寬猶活干戈塞未開
星霜元鳥變身世白駒催伏枕因超忽扁舟任往來
九鑽巴燠火三蟄楚祠雷望帝傳應實昭王問不回
蛟螭深作橫豺虎亂雄猜素業行已矣浮名安在哉
琴鳥曲怨憤庭鶴舞摧頽秋水漫湘竹陰風過嶺梅
苦搖求食尾常曝報恩腮結舌防讒柄探腸有禍胎
蒼茫步兵哭展轉仲宣哀飢藉家家米愁徵處處極
休爲貧士歎任受衆人哈以上自述以感歎時事得喪初難識

榮枯劃易該差池分組冕合沓起蒿萊不必伊周地
皆登屈宋才宦豎擅國非伊周地也漢庭和異域晉而文士亦因之以進矣

史坻中台霸業尋常體宗臣忌諱災此似謂李輔國

宗陰使人刺之而不明誅所謂忌諱羣公紛戮力聖

災公夔府書懷亦以宗臣稱輔國謂榮枯易該也
慮宵衷衷進人太易則退之亦易所謂榮枯易該也
故衷衷不知所任若慎擇賢人使爲公輔

無愧斗魁之望則海內兵可數見銘鐘鼎真宜法斗

靖刑可措但垂旒資之足矣

魁願聞鋒鏑鑄莫使棟梁摧盤石圭多翦凶門轂少

推垂旒資穆穆祝網但恢恢赤雀翻然至黃龍不假

媒賢非夢傅野

收第二段

隱類鑿顏坏

收前一段

自古江湖客

冥心若死灰

噴薄如江河之決

寄彭州高三十五使君適虢州岑二十七長史

參三十韻

自注時患瘧病

故人何寂寞今我獨淒涼老去才難盡秋來興甚長
物情尤可見詞客未能忘海內知名士雲端各異方
高岑殊緩步沈鮑獨同行意愜關飛動篇終接混茫
舉天悲富駱近代惜盧王似爾官仍貴前賢命可傷
文外諸侯非棄擲半刺已翩翩詩好幾時見書成無
曲致使將男兒行處是

接頭過渡無痕關以下十韻承今我句

以客子鬪身強

羈旅推賢聖沈縣抵咎殃三年猶瘧疾一鬼不銷亡
隔日搜脂髓增寒抱雪霜徒然潛隙地有醜屢鮮妝
何太龍鍾極于今出處防無錢居帝里盡室在邊疆
劉表雖遺恨龐公至死藏心微傍魚鳥肉瘦怯豺狼
隴草蕭蕭白洮雲片片黃彭門劍閣外以下六韻
承故人句號
略鼎湖旁荆玉簪頭冷巴箋染翰光烏麻蒸續曬丹
橘露應嘗豈異神仙宅俱兼山水鄉竹齋燒藥竈花
嶼讀書牀更得清新否遙知對屬忙舊官甯改漢淳
俗本歸唐濟世宜公等收故
人安貧亦士常收今
我蚩尤

終戮辱胡羯漫猖狂會待妖氛靜論文暫裹糧

寄劉峽州伯華使君四十韻

峽內多雲雨秋來尚鬱蒸遠山朝白帝深水謁夷陵
遲暮嗟爲客西南喜得朋哀蟻更起坐落鴈失飛騰

伏枕思瓊樹臨軒對玉繩青松寒不落碧海闊逾澄

昔歲文爲理

以下述世交

羣公價盡增家聲同令聞時論

以儒稱太后當朝肅多才接迹昇

杜審言子并死劉允濟爲文祭之見

杜本傳足徵其交密中宗初置修文館審言允濟皆爲直學士然其初宦皆在武后時下翠虛一聯謂中

宗復辟也

翠虛捎颺颺丹極上鷓鴣宴引春壺酒恩分夏

簞冰雕章五色筆紫殿九華鐙學並盧王敏書偕褚

薛能老兄真不墜

以下論文

小子獨無承近有風流作

承老

兄聊從月繼徵放蹠知赤驥振翅服蒼鷹卷軸來何

晚襟懷庶可憑會期吟諷數益破旅愁凝雕刻初誰

料纖毫欲自矜神融躡飛動戰勝洗侵凌妙取筌蹠

棄高宜百萬層白頭遺恨在

承小子句

青竹幾人登迴首

追談笑

以下敘世事出處

勞歌跼寢興年華紛已矣世故莽

相仍刺史諸侯貴

謂劉

郎官列宿應

謂自

潘生驂閣遠

謂自

黃霸璽書增

劉謂

乳贇號攀石飢龜訴落藤

言託

藥囊

親道士灰劫問胡僧憑久烏皮綻簪稀白帽稜林居

看蟻穴野食待魚醫筋力交凋喪飄零免戰兢昔爲

百里宰

承飄

正似六安丞姘女縈新裹

承筋

丹砂冷

舊秤但求椿壽永

承姘

莫慮杞天崩

承昔

鍊骨調情

性

自謂

張兵撓棘矜

劉謂

養生終自惜

承鍊

伐叛必全懲

承張

政術甘疏誕

收後段世

詞場愧服膺

收前段

展

懷詩頌魯割愛酒如澠咄咄甯書字冥冥欲避憎江

湖多白鳥天地有青蠅

陸璣疏鷺水鳥也

好而潔白

滄洲白鳥羣

公此詩亦言與鷗鷺爲侶耳

所居地蓋有不能安者冀劉愨念世交爲濟其困又

言己非有大望但得避害閑居養生談藝

足矣其詞微嫌鬱塞故是意興不佳時也

奉送郭中丞兼太僕卿充隴右節度使三十韻

讀少陵贈送人詩正如昌黎贈送人序橫

空而來盡意而止變化神奇初無定格

今體詩

五言卷六

六一中華書局聚

詔發山西將秋屯隴右兵淒涼餘部曲燁赫舊家聲
鵬鷲乘時去驂騮顧主鳴艱難須上策容易即前程

斜日當軒蓋高風卷旆旌松悲天水冷沙亂雪山清

和虜猶懷惠二韻言隴右無事防邊詎敢驚古來於異域鎮

靜示專征燕薊奔封豕十一韻言中原方急宜當劇任周秦觸駭鯨

中原何慘黷餘孽尚縱橫箭入昭陽殿笳吟細柳營

內人紅袖泣王子白衣行宸極妖星動園林殺氣盈

空餘金椀出無復總帷輕毀廟天飛雨焚宮火徹明

罟罟朝共落輪奐夜同傾三月師逾整羣胡勢就烹

瘡痍親接戰勇決冠垂成妙譽期元宰殊恩且列卿

幾時回節鉞戮力掃欃槍圭竇三千士六韻入雲梯送別

七十城恥非齊說客甘作魯諸生通籍微班忝周行

獨坐榮隨肩趨漏刻短髮寄簪纓徑欲依劉表還疑

厭禰衡漸衰那此別忍淚獨含情廢邑狐狸語

四韻
仍言

己望郭濟
世之意

空村虎豹爭人頻墜塗炭公豈忘精誠元帥調新律前軍壓舊京安邊仍扈從莫作後功名

上韋左相二十韻

鳳歷軒轅紀龍飛四十春八荒開壽域一氣轉洪鈞
霖雨思賢佐丹青憶老臣應圖求駿馬驚代得麒麟
沙汰江河濁調和鼎鼐新章賢初相漢范叔已歸秦
盛業今如此傳經固絕倫豫章深出地滄海闊無津
北斗司喉舌東方領縉紳持衡留藻鑑聽履上星辰
獨步才超古餘波德照鄰聰明過管輅尺牘倒陳遵
豈是池中物由來席上珍廟堂知至理風俗盡還淳
才傑俱登用愚蒙但隱淪長卿多病久子夏索居貧
回首驅流俗生涯似衆人巫咸不可問鄒魯莫容身

感激時將晚蒼茫興有神爲公歌此曲涕淚在衣巾
投贈哥舒開府翰二十韻

今代麒麟閣何人第一功君王自神武駕馭必英雄
開府當朝傑論兵邁古風先鋒百勝在略地兩隅空
青海無傳箭天山早挂弓廉頗仍走敵魏絳已和戎
每惜河湟棄新兼節制通智謀垂睿想出入冠諸公
日月低秦樹乾坤遶漢宮胡人愁逐北宛馬又從東
受命邊沙遠歸來御席同軒墀曾寵鶴畋獵舊非熊
茅土加名數山河誓始終策行遺戰伐氣合動昭融
勳業青冥上交親氣槩中未爲珠履客已見白頭翁
壯節初題柱生涯獨轉蓬幾年春草歇今日暮途窮
軍事留孫楚行閒識呂蒙防身一長劍將欲倚崆峒

奉贈太常張卿二十韻

方丈三韓外崑崙萬國西建標天地闢詣絕古今迷
氣得神仙迴恩承雨露低相門清議衆儒術大名齊
軒冕羅天闕琳琅識介珪伶官詩必誦夔樂典猶稽
健筆陵鸚鵡銛鋒瑩鷓鴣友于皆挺拔公望各端倪
通籍逾青瑣亨衢照紫泥靈虬傳夕箭歸馬散霜蹄
能事聞重譯嘉蕃及遠黎弼諧方一展班序更何躋
適越空顛躓游梁竟慘悽謬知終畫虎微分是醢雞
萍泛無休日桃陰想舊蹊吹嘘人所羨騰躍事仍睽
碧海真難涉青雲不可梯顧深慚鍛鍊才小辱提攜
檻束哀猿叫枝驚夜鵲棲幾時陪羽獵應指釣璜谿

按此詩前人以爲贈張垺是也垺爲主壻地連禁密
望之不可攀躋若神仙然故以方丈崑崙形容容貴峻
氣象亦暗用蕭史事耳公於垺蓋有文謙之遇故贈
此詩及其居翰林與外人隔絕矣李德裕言舊制駙
馬都尉與要官禁不往來開元中訶督尤切故再贈
八韻有無復隨高鳳之句再贈之作不復稱其家世

才望以先有此作故也題下注珀字傳本偶誤作均
蒙叟必欲作贈均均既非太常又起四句不能通則
謂均嘗爲元宗求妙寶真符于寶仙洞諷
其以求仙得幸使杜公文理大爲僻謬矣

移居公安敬贈衛大郎鈞

衛侯不易得余病汝知之雅量涵高遠清襟照等夷
平生感意氣少小愛文辭河海由來合風雲若有期
形容勞宇宙質樸謝軒墀自古幽人泣流年壯士悲
水煙通徑草秋露接園葵入邑豺狼鬪傷弓鳥雀飢
白頭供宴語烏几伴棲遲交態遭輕薄今朝豁所思

奉贈盧五丈參謀琚

自注時丈人使自江陵在長沙待命恩旨先支給錢

米鷄按此謂先有朝旨以湖南濟江陵給其錢米而湖南帥各未給琚待此帥命久未得故有蒼生轉寂寥之歎

恭惟同自出妙選異高標入幕知孫楚披襟得鄭僑
丈人藉才地門閥冠雲霄老矣逢迎拙相於契託饒

賜錢傾府待爭米駐船遙鄰好艱難薄氓心杼柚焦
客星空伴使寒水不成潮素髮乾垂領銀章破在腰
說詩能累夜醉酒或連朝藻翰惟牽率湖山合動搖
時清非造次興盡卻蕭條天子多恩澤蒼生轉寂寥
休傳鹿是馬莫信鵬如鴉未解依依袂還斟汎汎瓢
流年疲蟋蟀體物幸鷦鷯孤負滄洲願誰云晚見招

奉送嚴公入朝十韻

鼎湖瞻望遠象闕憲章新四海猶多難中原憶舊臣
與時安反側自昔有經綸感激張天步從容靜塞塵
南圖回羽翮北極捧星辰漏鼓還思晝宮鸚罷轉春
空留玉帳術愁殺錦城人閣道通丹地江潭隱白蘋
此生那老蜀不死會歸秦公若登台輔臨危莫愛身

湖南送敬十使君適廣陵

相見各頭白其如離別何幾年一會面今日復悲歌
少壯樂難得歲寒心匪他氣纏霜匣滿冰置玉壺多
遭亂實漂泊濟時曾琢磨形容吾較老膽力爾誰過
秋晚嶽增翠風高湖湧波騫騰訪知己淮海莫蹉跎

奉贈蕭十一使君

昔在嚴公幕俱爲蜀使臣艱危參大府前後閒清塵
起草鳴先路乘槎動要津王鳧聊暫出蕭雉止相馴
終始任安義荒蕪孟母鄰聯翩匍匐禮意氣死生親
張老存家事嵇康有故人食恩慚鹵莽鏤骨抱酸辛
巢許山林志

巢許六句皆以己與蕭對鵬圖乃公自指但取南行意

夔龍廊廟

珍鵬圖仍矯翼熊軾且移輪磊落衣冠地蒼茫土木
身熏篋鳴自合金石瑩逾新重憶羅江外同游錦水
濱結歡隨過隙懷舊益霑巾曠絕含香舍稽留伏枕

辰停驂雙闕早迴鴈五湖春不達長卿病從來原憲
貧監河受貸粟一起轍中鱗

秦州見敕目薛三璩授司議郎畢四曜除監察
與二子有故遠喜遷官兼述索居三十韻

大雅何寥闕斯人尚典型交期余潦倒材力爾精靈
二子升同日諸生困一經文章開窾奧遷擢潤朝廷
舊好何由展新詩更憶聽別來頭併白相見眼終青
以上六韻了題以下敘
昔同遭禍亂及收京事伊昔貧皆甚同憂歲不甯棲

遑分半菽浩蕩逐流萍俗態猶猜忌妖氛忽杳冥獨
慚投漢閣俱議哭秦庭還蜀祗無補囚梁亦固扃華
夷相混合宇宙一羶腥帝力收三統天威總四溟舊
都俄望幸清廟肅惟馨雜種雖高壘長驅甚建瓴焚
香淑景殿漲水望雲亭法駕初還日羣公若會星宮

臣仍黥染柱史正零丁官忝趨棲鳳朝回歎聚螢喚

人看駭裏不嫁惜娉婷

公爲拾遺時薛畢尚未得用故有不嫁之歎

掘劍

知埋獄

以下言薛畢得官已客秦州亂猶未弭意

提刀見發矟侏儒應共

飽漁父忌偏醒旅泊窮清渭長吟望濁涇羽書還似
急烽火未全停師老資殘寇戎生及近垆忠臣辭憤
激烈士涕飄零上將盈邊鄙元勳溢鼎銘仰思調玉
燭誰定握青萍隴俗輕鸚鵡原情類鵲鴿秋風動關
塞高臥想儀形

寄張十二山人彪三十韻

獨臥嵩陽客三違潁水春

首二句貫通篇艱難以下皆獨臥嵩陽時也

世祖以下十四韻皆獨臥嵩陽時也

艱難隨老母慘淡向時人謝氏尋

山展陶公漉酒巾羣凶彌宇宙此物在風塵歷下辭

姜被

歷下六韻言初與山人相識而關西得孟鄰早見其德藝之美疑其時在京師

通交契密晚接道流新靜者心多妙先生藝絕倫草

書何太苦詩興不無神曹植休前輩張芝更後身數

篇吟可老一字買堪貧將恐曾防寇將恐六韻言山人奉母避亂而

與己再遇也疑其時在鳳翔深潛託所親甯聞倚門夕盡力潔餐

晨疏懶爲名誤驅馳喪我真索居猶寂寞相遇益悲

辛流轉依邊徼逢迎念席珍時來故舊少亂後別離

頻流轉句承索居邊徼者公室家在鄭邠時也逢迎

頻句承相遇時來句承逢迎亂後句承流轉也頻字收上又世祖修高廟文公賞從臣世祖五韻言

起下半篇遂歸嵩陽也蓋山人曾見肅宗於鳳商山猶入楚渭

水不離秦商山句言山人由是路存想青龍祕騎行

白鹿馴耕巖非谷口結草卽河濱肘後符應驗囊中

藥未陳旅懷殊不愜旅懷以下九韻乃言己良覲渺

無因自古皆悲恨浮生有屈伸此邦今尚武何處且

依仁鼓角陵天籟關山信月輪官場羅鎮磧賊火近
洮岷蕭瑟論兵地蒼茫鬪將辰大軍多處所餘孽尚
紛綸高興知籠鳥斯文起獲麟窮秋正搖落迴首望
松筠

情事甚雜敘來總不費力
但覺跌宕頓挫首尾浩然

寄岳州賈司馬六丈巴州嚴八使君兩閣老五
十韻

衡岳嘯猿裏巴州鳥道邊故人俱不利謫宦兩悠然
開闢乾坤正榮枯雨露偏長沙才子遠釣瀨客星懸
憶昨趨行殿殷憂捧御筵討胡愁李廣奉使待張騫
無復雲臺仗虛修水戰船蒼茫城七十流落劍三千
畫角吹秦晉旄頭俯澗瀍小儒輕董卓有識笑符堅
浪作禽填海那將血射天萬方思助順一鼓氣無前
陰散陳倉北晴熏太白巔亂麻屍積衛破竹勢臨燕

法駕還雙闕王師下八川此時霑奉引佳氣拂周旋

貔虎開金甲麒麟受玉鞭侍臣諳入仗廢馬解登仙

花動朱樓雪城凝碧樹煙衣冠心慘愴故老淚潺湲

哭廟悲風急朝正霽景鮮

以上敘收京事承開闢乾坤正以下敘同朝以逮還

謫承榮枯雨露偏

月分梁漢米春給水衡錢內藥繁於顯宮

莎軟勝絲恩榮同拜手出入最隨肩晚著華堂醉寒

重繡被眠轡齊兼秉燭書柱滿懷牋每覺昇元輔深

期列大賢秉鈞方咫尺鑿羽再聯翩禁掖朋從改微

班性命全青蒲甘受戮白髮竟誰憐弟子貧原憲諸

生老服虔師資謙未達鄉黨敬何先舊好腸堪斷

以下

十韻思嚴賈而勉戒之

新愁眼欲穿翠乾危棧竹紅膩小湖蓮

賈筆論孤憤嚴君賦幾篇定知深意苦莫使衆人傳

貝錦無停織朱絲有斷絃浦鷗防碎首霜鷗不空拳

地僻昏炎瘴山稠隘石泉且將棋度日應用酒爲年
典郡終微渺治中實棄捐安排求傲吏比興展歸田
去去才難得以下自述所處蒼蒼理又元古人稱逝矣吾道
卜終焉隴外翻投迹漁陽復控弦笑爲妻子累甘與
歲時遷親故行稀少兵戈動接聯他鄉饒夢寐失侶
自迤邐多病加淹泊長吟阻靜便如公盡雄俊志在
必騰騫

寄李十二白二十韻

昔年有狂客號爾謫仙人筆落驚風雨詩成泣鬼神
聲名從此大汨沒一朝伸文彩承殊渥流傳必絕倫
龍舟移棹晚獸錦奪袍新白日來深殿青雲滿後塵
乞歸優詔許遇我宿心親未負幽棲志兼全寵辱身
劇談憐野逸嗜酒見天真醉舞梁園夜行歌泗水春

才高心不展道屈善無鄰處士彌衡俊諸生原憲貧

稻梁求未足蕙苒謗何頻五嶺炎蒸地三危放逐臣

幾年遭鵬鳥獨泣向麒麟

先敘其貶謫下乃明其枉

蘇武先還漢

黃公豈事秦楚筵辭醴日梁獄上書辰已用當時法

誰將此義陳老吟秋月下病起暮江濱莫怪恩波隔

乘槎與問津

末四句入自己意言己從賊中蒙死歸朝尚遭廢棄何怪白之隔于恩波乎但

乘槎相就而已其詞含蓄不盡斯可以怨矣

贈王二十四侍御契四十韻

此王契蓋蜀人所居郊野不常在成

都城者其侍御似亦是嚴武幕中之假銜也

往往雖相見飄飄媿此身不關輕紱冕俱是避風塵

一別星橋夜三移斗柄春敗亡非赤壁奔走爲黃巾

子去何瀟灑余藏異隱淪書成無過雁衣故有懸鶉

恐懼行裝數伶俜臥疾頻曉鷺工迸淚秋月解傷神

會面嗟鰲黑含悽話苦辛接輿還入楚

謂王

粲不歸

秦

自謂

錦里殘丹竈花溪待釣綸消中祇自惜晚起索

誰親伏柱聞周史

謂王

乘槎有漢臣

自謂

鴛鴻不易狎龍

虎未宜馴

言兩入相

知俱少而各處一地

客則挂冠至交非傾蓋新

由來意氣合直取性情真浪迹同生死無心恥賤貧

偶然存蔗芋幸各對松筠麤飯依他日窮愁怪此辰

女長裁褐穩男大卷書勻瀟口江如練蠶崖雪似銀

名園當翠巘野棹沒青蘋

此四韻言至王所居也

屢喜王侯宅

時邀江海人追隨不覺晚款曲動彌旬但使芝蘭秀

何煩棟宇鄰山陽無俗物鄭驛正留賓出入並鞍馬

光輝參席珍重遊先主廟更歷少城闈石鏡通幽魄

琴臺隱絳脣送終惟糞土結愛獨荆榛置酒高林下

觀碁積水濱區區甘累跼稍稍息勞筋網聚黏圓鯽

絲繁煮細葦長歌敲柳瘦小睡凭藤輪

此十二韻言王至城中同

遊

農月須知課田家敢忘勤浮生難去食良會惜清

晨

此言王歸所居

列國兵戈暗今王德教淳要聞除猘獠休

作畫麒麟洗眼看輕薄虛懷任屈伸莫令膠漆地萬

古重雷陳

秋日夔府詠懷奉寄鄭監審李賓客之芳一百

韻

絕塞烏蠻北孤城白帝邊飄零仍百里消渴已三年

雄劍鳴開匣羣書滿繫船亂離心不展衰謝日蕭然

筋力妻孥問菁華歲月遷登臨多物色陶冶賴詩篇

峽束滄江起

以下八韻賦夔峽之景

巖排石樹圓拂雲霾楚氣

朝海蹴吳天煮井爲鹽速燒畝度地偏有時驚疊嶂

何處覓平川瀉鵝雙雙舞獼猴壘壘縣碧蘿長似帶

錦石小如錢春草何曾歇
寒花亦可憐獵人吹戍火
野店引山泉喚起搔頭急

以下十韻述己流落因入夔州飲宴

扶行幾

屐穿兩京猶薄產四海絕隨肩
幕府初交辟郎官幸
備員瓜時猶旅寓萍泛苦賚緣
藥餌虛狼藉秋風灑

靜便開襟祛瘴癘明目掃雲煙
高宴諸侯禮佳入上

客前哀箏傷老大華屋豔神仙
南內開元曲常時弟

子傳法歌聲變轉滿座涕潺湲

太史公敘事牽連旁入曲致無不盡詩中

惟少陵時亦有之

弔影夔州僻

以下十二韻傷朝廷治亂

回腸杜曲煎卽

今龍廢水莫帶犬戎羶耿賈扶王室蕭曹拱御筵
乘威滅蜂蠹戮力效鷹鷂舊物森猶在凶徒惡未悛
國須行戰伐人憶止戈鋌奴僕何知禮恩榮錯與權
胡星一彗孛黔首遂拘攣哀痛絲綸切煩苛法令蠲
業成陳始王北喜出于畋宮禁經綸密台階翊戴全熊

羆戴呂望鴻鴈美周宣側聽中興主長吟不世賢

以下

十四韻皆稱鄭李

音徽一柱數道里下牢千鄭李光時論文

章並我先陰何尚清省沈宋歟聯翩律比崑崙竹音
知燥溼絃風流俱善價愜當久忘筌置驛常如此登
龍蓋有焉雖云隔禮數不敢墜周旋高視收人表虛
心味道元馬來皆汗血鶴唳必青田羽翼商山起蓬
萊漢閣連管甯紗帽靜江令錦袍鮮東郡時題壁南
湖日扣舷遠游陵絕境佳句染華箋每欲孤飛去

以下

十韻數相憶而不見以隔於兵戈也

徒爲百慮牽生涯已寥落國步尚

迤邐衾枕成蕪沒池塘作棄捐別離憂怛怛伏臘涕
漣漣露菊斑豐鎬秋菰影澗瀍共誰論昔事幾處有
新阡富貴空回首喧爭懶著鞭兵戈塵漠漠江漢月
娟娟局促看秋燕蕭疏聽晚蟬雕蟲蒙記憶烹鯉問

沈繇卜羨君平杖以下十二韻述己窮居之狀偷存子敬甕囊虛

把釵釧米盡圻花鈿甘子陰涼葉茅齋八九椽陣圖

沙北岸市暨瀼西巔羈絆心嘗折棲遲病卽痊紫收

岷嶺芋白種陸池蓮色好梨勝頰穰多粟過拳勅廚

唯一味求飽或二三鱸兒去看魚笱人來坐馬韉縛柴

門窄窄通竹溜涓涓塹抵公畦棱村依野廟埂缺籬

將棘拒倒石賴藤纏借問頻朝謁以下十韻言己無能仕宦以功名望

鄭李何如穩晝眠誰云行不逮自覺坐能堅霧雨銀章

澀馨香粉署妍紫鸞無近遠黃雀任翩翹困學違從

衆明公各勉旗聲華夾宸極早晚到星躔懇諫留匡

鼎諸儒引服虔不過輸鯁直會是正陶甄宵旰憂虞

軫黎元疾苦駢雲臺終日畫青簡爲誰編行路難何

有以下十八韻言將去夔往求禱學途中將見鄭李招尋興已專由來具飛

檝暫擬控鳴弦身許雙峯寺門求七祖禪落帆追宿
昔衣褐向真詮安石名高晉昭王客赴燕途中非阮
籍槎上似張騫披拂雲甯在淹留景不延風期終破
浪水怪莫飛涎他日辭神女傷春怯杜鵑淡交隨聚
散澤國遶迴旋本自依迦葉何曾藉偓佺鑪峯生轉
盼橘井尚高褰東走窮歸鶴南征盡跼鳶晚聞多妙
教卒踐塞前愆顧凱丹青列頭陀琬玉鑄衆香深黯
黯幾地蕭芊芊勇猛爲心極清羸任體孱金篋空刮
眼鏡象未離銓此詩後半覺用意少漫頗有率率處
前半則淨爍蕭瑟分別觀之公老
病途窮身無所倚託言將往求禪寶欲鄭李
爲之主入然淺交難以直言故意復鬱塞

謁先主廟

慘澹風雲會乘時各有人力侔分社稷志屈偃經綸
復漢留長策中原仗老臣雜耕心未已嘔血事酸辛

霸氣西南歇雄圖歷數屯錦江元過楚劍閣復通秦
舊俗存祠廟空山泣鬼神虛檐交鳥道枯木半龍鱗
竹送清谿月苔移玉座春閭閻兒女換歌舞歲時新
絕域歸舟遠荒城繫馬頻如何對搖落況乃久風塵
孰與關張並功臨耿鄧親應天才不小得士契無鄰
遲暮堪帷幄飄零且釣緡向來憂國淚寂寞灑衣巾

冬日洛城北謁元元皇帝廟

配極元都闕憑高禁籟長守祧嚴具禮掌節鎮非常
碧瓦初寒外金莖一氣旁山河扶繡戶日月近雕梁
仙李盤根大猗蘭奕葉光世家遺舊史道德付今王
畫手看前輩吳生遠擅場森羅移地軸妙絕動宮牆
五聖聯龍袞千官列鴈行冕旒俱秀發旌旆盡飛揚
翠柏深留景紅梨迴得霜風箏吹玉柱露井凍銀牀

身退卑周室經傳拱漢皇谷神如不死養拙更何鄉
世以此詩爲不應入畫一段非也此是老子廟豈比
真唐之宗廟以嚴重爲得體耶必有此段既深諷刺
而文外曲致閒情
具足正爲佳耳

行次昭陵

舊俗疲庸主羣雄問獨夫識歸龍鳳質威定虎狼都
天屬尊堯典神功協禹謨風雲隨絕足日月繼高衢
文物多師古朝廷半老儒直詞甯戮辱賢路不崎嶇
往者災猶降蒼生喘未蘇指揮安率土盪滌撫洪鑪
壯士悲陵邑幽人拜鼎湖玉衣晨自舉石馬汗常趨
松柏瞻虛殿塵沙立暝途寂寥開國日流恨滿山隅

重經昭陵

草昧英雄起謳歌歷數歸風塵三尺劍社稷一戎衣

薑塢先生云宇文周宗廟歌詞有終封三尺翼亮貞
劍長卷一戎衣此子山之作也杜蓋本之

文德丕承哉武威聖圖天廣大宗祀日光輝陵寢盤
空曲熊羆守翠微再窺松柏路還見五雲飛

舟中出江陵南浦奉寄鄭少尹審

更欲投何處飄然出此都形骸元土木舟楫復江湖
社稷纏妖氣干戈送老儒百年同棄物萬國盡窮途
雨洗平沙淨天銜闕岸紆鳴蜚隨泛梗別燕赴秋菰
棲託難高臥飢寒迫向隅寂寥相煦沫浩蕩報恩珠
溟漲鯨波動衡陽鴈影徂南征問縣榻東逝想乘桴
濫竊商歌聽時憂卞泣誅經過憶鄭驛斟酌旅情孤

前詩云淡交隨聚散此復云寂寥
相煦沫然則審於公誼蓋甚薄

將別巫峽贈南卿兄瀼西果園四十畝

苔竹素所好萍蓬無定居遠遊長兒子幾地別林廬
雜藥紅相對他時錦不如具舟將出峽巡圃念攜鋤

正月喧鶯未茲辰放鷓初雪籬梅可折風榭柳微舒
托贈卿家有因歌野興疏殘生逗江漢何處狎樵漁
往復圓折
韻味絕妙

暮春江陵送馬大卿公恩命追赴闕下

自古求忠孝名家信有之吾賢富才術此道未磷緇
玉府標孤映霜蹄去不疑激揚音韻徹籍甚衆多推
潘陸應同調孫吳亦異時北辰徵事業南紀赴恩私
卿月昇金掌王春度玉墀薰風行應律湛露卽歌詩
天意高難問人情老易悲樽前江漢闊後會且深期

王閩州筵奉酬十一舅惜別之作

萬壑樹聲滿千崖秋氣高浮舟出郡郭別酒寄江濤
良會不復久此生何太勞窮途但有骨羣盜尚如毛
吾舅惜分手使君寒贈袍沙頭暮黃鶴失侶亦哀號

奉觀嚴鄭公廳事岷山沱江畫圖十韻得忘字
沱水臨中座岷山對北堂白波吹粉壁青嶂插雕梁
直訝杉松冷兼疑菱苳香雪雲虛點綴沙草得微茫
嶺鴈隨毫末川蜺飲練光霏紅洲藁亂拂黛石蘿長
暗谷非關雨丹楓不爲霜秋城元圃外景物洞庭旁
繪事功殊絕幽襟興激昂從來謝太傅邱壑道難忘

細膩閒適此等唐諸家亦能之不必杜公矣

奉和嚴中丞西城晚眺十韻

汲黯匡君切廉頗出將頻直詞才不世雄略動如神
政簡移風速詩清立意新層城臨媚景絕域望餘春
旗尾蛇龍會樓頭燕雀馴地平江動蜀天闊樹浮秦
帝念深分閩軍須遠算緡花羅封蛺蝶瑞錦送麒麟
辭第輸高義觀圖憶古人征南多興緒事業闡相親

此十韻則
雄健勝前

春歸

苔徑臨江竹茅檐覆地花
別來頻甲子歸到又春華
倚杖看孤石傾壺就淺沙
遠鷗浮水靜輕燕受風斜
世路雖多梗吾生亦有涯
此身醒復醉乘興卽爲家

哭李尚書之芳

漳濱與蒿里逝水竟同年
欲挂留徐劍猶迴憶戴船
相知成白首此別閒黃泉
風雨嗟何及江湖涕泫然
修文將管輅奉使失張騫

吐之芳廣德初使蕃被留二年

史閣行人

在詩家秀句傳客亭鞍馬絕
旅櫬網蟲縣復魄昭邱
遠歸魂素澹偏樵蘇封葬地
喉舌罷朝天秋色凋春
草王孫若箇邊

公與之芳聚會於江陵甫離江陵於道中遽聞之芳之死起四韻述此意

最爲沈痛

奉漢中王手札報韋侍御蕭尊師亡

秋日蕭韋逝淮中報峽中少年疑柱史多術怪仙公
不但時人惜祇應吾道窮一哀侵疾病相識自兒童
處處鄰家笛飄飄客子蓬強吟懷舊賦已作白頭翁

五言今體詩鈔卷第六

五言今體詩鈔卷第七

韋應物四首

淮上喜會梁州故人

江漢曾爲客相逢每醉還
浮雲一別後流水十年閒
歡笑情如舊蕭疏鬢已班
何因不歸去淮上有青山

揚州偶會前洛陽盧耿主簿

楚塞故人稀相逢本不期
猶存袖裏字忽怪鬢邊絲
客舍盈尊酒江行滿篋詩
更能聯騎出還似洛橋時

賦得暮雨送李胄

楚江微雨裏建業暮鐘時
漠漠帆來重冥冥鳥去遲
海門深不見浦樹遠含滋
相送情無限沾襟比散絲

送別覃孝廉

思親當自去不第未蹉跎
家住青山下門前芳草多

秭歸通遠徼巫峽注驚波州舉年年事還期復幾何

劉文房二十五首

藝文志丁部載其爲至德監察御史檢校祠部員外郎爲轉運

使判官知淮西鄂岳轉運留後鄂岳觀察使吳仲儒誣奏貶潘州南巴尉除睦州司馬隨州刺史

經漂母墓

昔賢懷一飯茲事已千秋古墓樵人識前朝楚水流
渚蘋行客薦山木杜鵑愁春草茫茫綠王孫舊此游

秋日登吳公臺上寺遠眺

寺卽陳將吳明徹戰場

古臺搖落後秋日望鄉心野寺來人少雲峯隔水深
夕陽依舊壘寒磬滿空林惆悵南朝事長江獨至今

清明後登城眺望

風景清明後雲山睥睨前百花如舊日萬井出新煙
草色無空地江流合遠天長安何處是遙指夕陽邊

松江獨宿

洞庭初下葉孤客不勝愁
明月天涯夜青山江上秋
一官成白首萬里寄滄洲
久被浮名繫能無愧海鷗

餘干旅舍

搖落暮天迴青楓霜葉稀
孤城向水閉獨鳥背人飛
渡口月初上鄰家漁未歸
鄉心正欲絕何處擣寒衣

北歸次秋浦界青谿館

萬里蟻噓斷孤村客暫依
鴈過彭蠡暮人向宛陵稀
舊路青山在餘生白首歸
漸知行近北不見鷓鴣飛

岳陽館中望洞庭湖

萬古巴邱戍平湖此望長
問人何處綠愁暮更蒼蒼
疊浪浮元氣中流沒太陽
孤舟有歸客早晚達瀟湘

歸疑
遷

穆陵關北逢人歸漁陽

元和郡縣志光山縣木

里麻城縣穆陵關在西北八十里霽按此地

兩縣分界只是一關其字則作木爲正右丞以

逢君穆陵路匹馬向桑乾楚國蒼山古幽州白日寒

城池百戰後耆舊幾家家殘處處蓬蒿徧歸人掩淚看

逢郴州使因寄鄭協律

相思楚天外夢寐楚媛吟更落淮南葉難爲江上心

第三句用淮南子木葉落長年悲四句用招魂湛湛

江水上有楓目極千里傷春心然又是卽目如非用

古衡陽問人遠湘水向君深欲逐孤帆去茫茫何處

尋何減右丞

和州留別穆郎中

穆甯大歷初爲和州刺史

播遷悲遠道搖落感衰容今日猶多難何年更此逢
世交黃葉散鄉路白雲重明發看煙樹惟聞江北鐘

送張扈司直歸越中

時危身赴難事往任浮沈萬里三江客孤城百戰心
春風吳草綠古木剡山深明月滄洲路歸雲不可尋

送李中丞之襄州

流落征南將曾驅十萬師罷歸無舊業老去戀明時
獨立三邊靜輕生一劍知茫茫江漢上日暮復何之

送梁侍御巡永州

蕭蕭江雨暮客散野亭空憂國天涯去思鄉歲暮同
到時暖未斷迴處水應窮莫望零陵路千峯萬木中

送金昌宗歸錢塘

新家浙江上獨泛落潮歸秋水照華髮涼風生褐衣
柴門嘶馬少藜杖拜人稀惟有陶潛柳蕭條對掩扉

和州送人歸復郢

因家漢水曲相送掩柴扉故郢生秋草寒江澹落暉
綠林行客少赤壁住人稀獨過潯陽去潮歸人未歸

更被奏留淮南送從弟罷使江東

此當是爲淮
西轉運留後

時

又作淮南客還悲木葉聲寒潮落瓜步秋色上蕪城
王事何時盡滄洲羨爾行青山將綠水惆悵不勝情

酬皇甫侍御見寄

唐藝文志皇甫會侍
御史貶舒州司馬

離別江南北汀洲葉再黃路遙雲共水沙迴月如霜

歲儉依仁政

自注姑臧相國親臨郡
其族稱姑臧房以宰相貶袁州長史事

在上元二年揆流落十六年乃拜睦州刺史
大歷十二年也是時文房蓋爲睦州司馬矣年衰憶

故鄉佇君宣室召漢法倚張綱

碧澗別墅喜皇甫侍御相訪

荒村帶返照落葉亂紛紛古路無行客寒山獨見君

野橋經雨斷，磧水向田分。不爲憐同病，何人到白雲。

何減摩詰

尋常山南谿道士隱居

一路經行處，莓苔見屐痕。白雲依靜渚，芳草閉閒門。
過雨看松色，隨山到水源。谿花與禪意，相對亦忘言。
重過宣峯寺山房寄靈一上人

西陵潮信滿，島嶼入中流。越客依風水，相思南渡頭。
寒光生極浦，暮雪映滄洲。何事揚帆去，空驚海上鷗。
過張明府別業

寥寥東郭外，白首一先生。解印孤琴在，移家五柳成。
夕陽臨水釣，春雨向田耕。終日空林下，何人識此情。
新年作

鄉心新歲切，天畔獨潛然。老至居人下，春歸在客先。

嶺蟻同日暮江柳共風煙已似長沙傅從今又幾年

偶然作

野寺長依止田家或往還老農開古地夕鳥入寒山
書劍身同廢煙霞吏共閒豈能將白髮扶杖出人閒

謫至于越亭作

天南愁望絕亭上柳條新落日獨歸鳥孤舟何處人

生涯投越徼世業陷胡塵杳杳鍾陵暮

唐地志南昌縣本豫章武

德五年析置鍾陵八年省寶應元年更豫章曰鍾陵

悠悠番水春秦臺悲白首

楚澤怨青蘋草色迷征路鶯聲傍逐臣獨醒翻引笑
直道不容身得罪風霜苦全生天地仁青山數行淚
滄海一窮鱗牢落機心盡唯應鷗鳥親

棲霞寺東峯尋南齊明徵君故居

山人今不見山鳥自相從長嘯辭明主終身托此峯

泉源通石徑澗戶掩塵容古墓依寒草前朝寄老松
片雲生斷壁萬壑徧疏鐘惆悵空歸去猶疑林下逢
錢仲文八首

送張管書記

邊事多勞役儒衣逐鼓鼙日寒關樹外峯盡塞雲西
河廣蓬難度天遙鴈漸低班超封定遠之子去思齊

送彈琴李長史赴洪州

抱琴爲傲吏孤櫂復南征幾處秋江水皆添白雪聲
佳期來客夢幽思緩王程佐牧無勞問心和政自平
送少微師西行

隨緣忽西去何日返東林世路無期別空明不住心
人煙一飯少山雪獨行深天外蟻啼處誰聞清梵音
和萬年成少府寓直

赤縣新秋後文人藻思催鐘聲自仙掖月色近霜臺
一葉兼螢度孤雲帶鴈來明朝紫書下應問長卿才

裴迪書齋玩月

夜來詩酒興月上謝公樓影閉重門靜寒生獨樹秋
鵲驚隨葉散螢遠入煙流今夕遙天末清暉幾處愁

題玉山村叟屋壁

谷口好泉石居人能陸沈牛羊上山小煙火隔林深
一徑入谿色數家連竹陰藏虹辭晚雨驚隼落殘禽
涉趣皆流目將歸羨在林卻思黃綬事孤負紫芝心

太子李舍人城東別業與二三文友逃暑

下馬失炎暑重門深綠篁宮臣禮嘉客林表開蘭堂
茲日興難盡澄壘照墨場東林晚來好極目趣何長
鳥道挂疏雨人家殘夕陽城隅擁歸騎留酌戀瓊芳

奉和宣城張太守南亭秋夕懷友

池館蟪蛄聲梧桐秋露晴月臨朱戟靜河近畫樓明
捲幔浮涼入聞鐘永夜清片雲縣曙斗數鴈過秋城
雨扇揚風暇瑤琴悵別情江山飛麗藻謝朓讓前名
郎君曹五首

送彭將軍

雙旌漢飛將萬里授橫戈春色臨關盡黃雲出塞多
鼓鼙愁絕漠烽戍隔長河莫斷陰山路天驕已請和
送楊中丞和蕃

錦車登隴日邊草正萋萋舊好尋君長新愁聽鼓鼙
河源飛鳥外雪嶺大荒西漢壘今猶在遙知路不迷
盩厔縣鄭礪宅送錢大

暮蟬不可聽落葉豈堪聞共是悲秋客那知此路分

荒城背流水遠鴈入寒雲陶令門前菊餘花可贈君
送奚賈歸吳

東南富春渚曾是謝公游今日奚生去新安江正秋
水容清過客楓葉落行舟遙想赤亭下聞蟻應夜愁
送韓司直路出延陵

游吳還適越來往任風波復送王孫去其如春草何
岸明殘雪在湖滿夕陽多季子留遺廟停舟試一過
李君虞一首

見外弟又言別

十年離亂後長大一相逢問姓驚初見稱名憶舊容
別來滄海事語罷暮天鐘明日巴陵道秋山又幾重
韓君平二首

題薦福寺衡嶽陳師房

春城乞食還高論此中閒僧臘階前樹禪心江上山
疏簾看雪卷深戶映花關晚送門人出鐘聲杳靄閒
送太常元博士歸江東

渡江秋色裏詩興與歸心客路緣楓岸人家歸橘林
潮聲當晝起山翠近南深幾日華陽洞寒花獨自尋
李從一三首

送王牧往吉州謁王使君叔

細草綠汀洲王孫耐薄游年華初冠帶文體舊弓裘
野渡花爭發春塘水亂流使君矜小阮應念倚門愁
紀曉嵐尚書嘗譏此詩意緒承接不淸吾謂不然詩
言此細草初綠時一少年遠遊乎三四緊承此
意五六言春盛正少年在塗其母在家思念之時而
下以倚門愁作結其意緒頗分明不至如紀所斥

奉陪韋潤州過鶴林寺

野寺江城近雙旌五馬過禪心超忍辱梵語問多羅

松竹閒僧老雲煙晚日和寒塘歸路轉清磬隔微波

至七里瀨作

遷客投於越臨江淚滿衣獨隨流水去轉覺故人稀
萬木迎秋序千峯駐晚暉行舟猶未已惆悵暮潮歸

皇甫茂政二首

巫山高

巫峽見巴東迢迢出半空雲藏神女館雨到楚王宮
朝暮泉聲落寒暄樹色同清蟻不可聽偏在九秋中

奉和王相公早春登徐州城

廣德二年李臨淮卒於徐州以王縉

代都統河南淮西山南東道諸行營此縉所以有登徐州城之作

落日憑危堞春風似故鄉川流通楚塞山色繞徐方
壁壘依寒草旌旗動夕陽元戎資上策南畝起耕桑

歸渡洛水

暝色赴春愁歸人南渡頭渚煙空翠合灘月碎光流
澧浦饒芳草滄浪有釣舟誰知放歌客此意正悠悠
皇甫孝常一首

送李中丞歸本道

上將宜分閩雙旌復出秦關河三晉路賓從五原人
孤戍雲通海平沙雪度春酬恩看玉劍何處有煙塵
盧允言一首

送李端

故關衰草徧離別自堪悲路出寒雲外人歸暮雪時
少孤爲客早多難識君遲掩淚空相向風塵何處期
李端一首

茂陵山行陪韋工部

一作陪金部韋員外

宿雨朝來歇空山天氣清盤雲雙鶴下隔水一蟬鳴

古道黃花落平蕪赤燒生茂陵雖有病猶得伴君行

司空文明五首

經廢寶慶寺

黃葉前朝寺無僧寒殿開池清龜出曝松暝鶴飛回
古砌碑橫草陰廊畫雜苔禪宮亦銷歇塵世轉堪哀
喜外弟盧綸見宿

靜夜四無鄰荒居舊業貧雨中黃葉樹燈下白頭人
以我獨沈久愧君相見頻平生自有分況是蔡家親
三四句佳以與右丞雨中山果落聯同四字則減品
矣羊祜爲蔡伯喈外孫將進爵土乞以賜舅子蔡
襲見晉書又南史蔡興宗甥袁
顛子昂皆名士不知此詩何指

賊平後送人北歸

世亂同南去時清獨北還他鄉生白髮舊國見青山
曉月過殘壘繁星宿故關寒禽與衰草處處伴愁顏

雲陽館與韓紳宿別

故人江海別幾度隔山川乍見翻疑夢相悲各問年
孤鏡寒照雨溼竹暗浮煙更有明朝恨離杯惜共傳
送流人

聞說南中事悲君重竄身山村楓子鬼江廟石郎神
童稚留荒宅圖書託故人青門好風景爲爾一霑巾
崔峒二首

題崇福寺禪院

僧家更無事掃地與焚香清磬度山翠閒雲來竹房
身心塵外遠歲月坐中忘向晚禪堂閑無人空夕陽
登蔣山開善寺

山殿秋雲裏香煙出翠微客尋朝磬食僧背夕陽歸
下界千門見前朝萬事非看心兼送目葭菼暮依依

戴幼公二首

除夜宿石頭驛

旅館誰相問寒鐙獨可親
一年將盡夜萬里未歸人
寥落悲前事支離笑此身
愁顏與衰鬢明日又逢春

送友人東歸

此詩一作方干作題
爲送盧評事東歸

萬里楊柳色出關隨故人
輕煙拂流水落日照行塵
積夢江湖闊憶家兄弟貧
衰哀霸亭上不語自傷春

嚴正文一首

酬劉員外見寄

蘇耽佐郡時近出白雲司
藥補清羸疾窗吟絕妙詞
柳塘春水漫花塢夕陽遲
欲識懷君意明朝訪檝師

顧逋翁一首

雒陽早春

何地避春秋終年憶舊游一家千里外百舌五更頭
客路偏逢雨鄉山不入樓故園桃李月伊水向東流
于良史一首

冬日寄李贊府

地際朝陽滿天邊宿霧收風兼殘雪起河帶斷冰流
北闕馳心極南圖尚旅游登臨思不已何處可銷憂
章八元一首

新安江行

江源南去永野渡暫維梢古戍縣魚網空林露鳥巢
雪晴山脊見沙淺浪痕交自笑無媒者逢人卽解嘲
中二聯果爲佳句起結乃似轉
成凡才力不足者易有此病

鄭錫三首

邯鄲少年行

霞鞍金口騮豹袖紫貂裘家住叢臺近門前漳水流
喚人呈楚舞借客試吳鉤見說秦兵至甘心赴國讎

度關山

象弭插文犀魚腸瑩鷓鴣水聲分隴咽馬色度關迷
曉幕胡沙慘危峯漢月低仍聞數騎將更欲出遼西

末二字疑
是洮西誤

送客之江西

乘輶奉紫泥澤國渺天涯九派春潮滿孤帆暮雨低
草深鶯斷續花落水東西更有高堂處知君路不迷

釋皎然一首

尋陸鴻漸不遇

移家雖帶郭野徑入桑麻近種籬邊菊秋來未著花
扣門聞犬吠欲去問西家報道山中去歸時每日斜

似孟公

釋處然一首

題聖果寺

路自中峯上盤迴出薜蘿到江吳地盡隔岸越山多
古木叢青靄遙天浸白波下方城郭近鐘磬接笙歌

五言今體詩鈔卷第七



工部局全書

蘇州府志

蘇州府志

五言今體詩鈔卷第八

劉夢得四首

蜀先主廟

天下英雄氣千秋尚凜然勢分三足鼎業復五銖錢
得相能開國生兒不象賢淒涼蜀故伎來舞魏宮前
送河南皇甫少尹赴絳州

祖帳臨周道前旌指晉城午橋羣吏散亥字老人迎
詩酒同行樂別離方見情從茲洛陽社吟詠少書生

秋日送客至潛水驛

候吏立沙際田家連竹谿楓林社日鼓茅屋午時雞
雀噪晚禾地蝶飛秋草畦驛樓官樹近疲馬再三嘶
經伏波神祠

蒙蒙篁竹下有路上壺頭漢壘磨廳鬪蠻谿霧雨愁

懷人敬遺像閱世指東流自負霸王略安知恩澤侯
鄉關辭石柱筋力盡炎州一以功名累翻思馬少游

柳子厚三首

北還登漢陽北原題臨川驛

驅車方向闕回首一臨川多壘非余恥無謀終自憐

子厚北還正吳元濟畔亂用兵之日故此詩三四句以譏秉政者又言己昔在朝時不能豫消其患也

亂松知野寺餘雪記山田惆悵漁樵事今還又落然

梅雨

梅實迎時雨蒼茫值晚春秋愁深楚暖夜夢斷越雞晨
海霧連南極江雲暗北津素衣今盡化非爲帝京塵
酬婁秀才寓居開元寺早秋月夜病中見寄

客有故園思瀟湘生夜愁病依居士室夢遶羽人丘
味道憐知足遺名得自求壁空殘月曙門掩候蟲秋

謬委雙金重難徵雜佩酬碧霄無枉路從此助離憂
韓退之二首

送桂州嚴大夫

蒼蒼森入桂茲地在湖南江作青羅帶山如碧玉簪
戶多輪翠羽家自種黃甘遠勝登仙去飛鸞不暇驂
送鄭尚書赴南海

番禺軍府盛欲說暫停楮蓋海旗幢出連天觀閣開
衙時龍戶集上日馬人來風靜鷄鵬去官廉蚌蛤迴
貨通師子國樂奏武王臺事事皆殊異無嫌屈大才
張文昌五首

薊北旅思

日日望鄉國空歌白苧詞長因送人處憶得別家時
失意還獨語多愁祇自知客亭門外柳折盡向南枝

夜到漁家

漁家在江口湖水入柴扉行客欲投宿主人猶未歸
竹深村路遠月出釣船稀遙見尋沙岸春風動草衣

江南

江南楊柳春日暝地無塵渡口過新雨夜來生白蘋
晴沙眠乳雁芳樹醉游人向晚青山下誰家祭水神

山中古寺

春草空祠暮荒林惟鳥飛記年碑石在經亂祭人稀
野鼠緣珠帳陰塵蓋畫衣近來潭水黑時見宿龍歸

宿溪中驛

一作臨江驛

楚驛南渡口夜深來客稀月明見潮上江靜覺鷗飛
旅宿今已遠此行猶未歸離家久無信又聽搗寒衣

王仲初一首

南中

天南多鳥聲，州縣半無城。
野市依蠻姓，山村逐水名。
瘴煙沙上起，陰火雨中生。
獨有求珠客，年年入海行。

白樂天三首

百花亭

朱檻在空虛，涼風八月初。
山形如峴首，江色似桐廬。
佛寺乘舟入，人家枕水居。
高亭仍有月，今夜宿何如。

夜聞箏中彈瀟湘送神曲感舊

縹緲中山女，歸來七八年。
殷勤湘水曲，留在十三絃。
苦調吟還出，深情咽不傳。
萬重雲水思，今夜月明前。

草

離離原上草，一歲一枯榮。
野火燒不盡，春風吹又生。
遠芳侵古道，晴翠接荒城。
又送王孫去，萋萋滿別情。

秦公緒一首

山中贈張正則評事

系時被奏左衛以疾不就

終年常避喧自注五千言
流水閒過院春風與閉門
山容邀過客桂實落前軒
何事教余起微官不足論

賈浪仙六首

宿山寺

衆岫聳寒色精廬向此分
流星透疏木走月逆行雲
絕頂人來少松高鶴不羣
一僧年八十世事未嘗聞

暮過山村

數里聞寒水山家少四鄰
怪禽啼曠野落日恐行人
初月來終夕邊烽不過秦
蕭條桑柘外煙火漸相親

泥陽館

客愁何併起暮送故人回
廢館秋螢出空城寒雨來

夕陽飄白露樹影掃青苔獨坐離懷慘孤鐙照不開
憶江上吳處士

閩國揚帆去蟾蜍缺復團秋風吹渭水落葉滿長安
此地際會夕當時雷雨寒蘭橈殊未返消息海雲端
秋暮寄友人

寥落關河暮霜風樹葉低遠天垂地外寒日下峯西
有志煙霞切無家歲月迷清宵話白閣已負十年棲
送唐環歸敷水莊

毛女峯當戶日高頭未梳地侵山影掃葉帶露痕書
松徑僧尋藥沙泉鶴見魚一川風景好恨不有吾廬
姚合一首

山中述懷

爲客久未歸寒山獨掩扉曉來山鳥鬧雨過杏花稀

天遠雲空接谿深水自微此情對春色欲盡總忘機
顧非熊一首

陝州道中作

孤客秋風裏驅車出陝西關山午時路村落一聲雞
樹勢標秦遠天形到嶽低誰知我名姓來往自棲棲
張承吉六首

孤山寺

樓臺俯碧岑一逕入湖心不雨山長潤無雲水自陰
斷橋荒蘚合空院落花深猶憶西窗夜鐘聲出北林
題金山寺

蒙叟嘗鄙此詩以斥其結
句可耳中聯詎謂非佳

一宿金山寺微茫水國分僧歸夜船月龍出曉堂雲
樹影中流見鐘聲兩岸聞因悲在城市終日醉醺醺

惠山寺

舊宅人何在空門客自過
泉聲到池盡山色上樓多
小洞穿斜竹重階夾細莎
殷勤望城市雲水暮鐘和

題虎丘東寺

雲樹擁崔嵬深行異俗埃
寺門山外入石壁地中開
俯砌池光動登樓海氣來
傷心萬年意金玉葬寒灰

題松汀驛

山色遠含空蒼茫澤國東
海明先見日江白迴聞風
鳥道高原暮人煙小逕通
那知舊遺逸不在五湖中

晚夏歸別業

古岸扁舟晚荒園一徑微
鳥啼新果熟花落故人稀
宿潤侵苔鬢斜陽照竹扉
相逢盡鄉老無復話時機

釋無可一首

秋寄從兄賈島

暗蟲喧暮色默坐思西林聽雨寒更盡開門落葉深
昔因京邑病併起洞庭心亦是吾兄事遲回直至今

五言今體詩鈔卷第八



五言今體詩鈔卷第九

李義山十七首

楚宮

複壁交青鎖，重簾挂紫繩。如何一柱觀，不礙九枝燈。
扇薄常規月，釵斜只鏤冰。歌成猶未唱，秦火入夷陵。

夜飲

卜夜容衰鬢，開筵屬異方。燭分歌扇淚，雨送酒船香。
江海二年客，乾坤百戰場。誰能辭酪酏，淹臥劇清漳。

歸墅

行李逾南極，旬時到舊鄉。楚芝應徧紫，鄧橘未全黃。
渠濁村舂急，旗高社酒香。故山歸夢喜，先入讀書堂。
過故崔兗海宅，與崔明秀才話舊，因寄舊僚杜

趙李二掾

絳帳恩如昨烏衣事莫尋諸生空會葬舊塚已華簪
共入留賓驛俱分市駿金莫憑無鬼論終負托孤心

哭劉司戶蕢

義山此等詩殆得少
陵之神不僅形貌

路有論冤謫言皆在中興空聞遷賈誼不待相孫宏
江關惟回首天高但撫膺昔年相送地春雪滿黃陵
撰彭陽公誌文畢有感

延陵留表墓峴首送沈碑敢伐不加點猶當無愧辭
百生終莫報九死諒難追待得生金後川原亦幾移
獻寄舊府開封公

幕府二年遠春秋一字褒書論秦逐客賦續楚離騷
地理南溟闊天文北極高酬恩撫身世未覺勝鴻毛
河清與趙氏昆季讌集得擬杜工部

勝槩殊江右佳名逼渭川虹收青嶂雨鳥沒夕陽天

客鬢行如此滄波坐渺然此中真得地漂蕩釣魚船

裴明府居止

愛君茅屋下向晚水溶溶試墨書新竹張琴和古松
坐來聞好鳥歸去度疏鐘明日還相見橋南貰酒濃

楊本勝說於長安見小男阿袞

聞君來日下見我最嬌兒漸大嗔應數長貧學恐遲
寄人龍種瘦失母鳳雛癡語罷休邊角青鐙兩鬢絲

落花

高閣客竟去小園花亂飛參差連曲陌迢遞送斜暉
腸斷未忍掃眼穿仍欲稀芳心向春盡所得是霑衣

武侯廟前柏

蜀相階前柏龍蛇捧闕宮陰成外江畔老向惠陵東
大樹思馮異甘棠憶召公葉凋湘燕雨枝折海鵬風

玉壘經綸遠金刀歷數終誰將出師表一爲問昭融
戲贈張書記

別館君孤枕空庭我閉關池光不受月野氣欲沈山
星漢秋方會關河夢幾還危絃傷遠道明鏡惜紅顏
古木含風久平蕪盡日閒心知兩愁絕不斷若循環

五言述德抒情詩一首四十韻獻上杜七兄僕

射相公

此蓋杜綜以宰相出節度劍南西川時所以獻綜者二詩並工麗典切

帝作黃金闕

起句欲學工部方丈三韓外而不能有其雄闊

仙開白玉京有

人扶太極惟嶽降元精耿賈官勳大荀陳地望清旗

常縣祖德甲令著嘉聲經出宣尼壁書留晏子楹武

鄉傳陣法踐土主文盟自昔流王澤由來仗國楨九

河紛合沓一柱忽崢嶸得主勞三顧驚人肯再鳴碧

虛天共轉黃道日同行

此學日月低秦樹一聯

後飲曹參酒先

和傅說羹卽時賢路闢此夜泰階平願保無疆福將

圖不朽名率身期濟世叩額慮興兵感念殺屍露咨

嗟趙卒阮

此言平劉楨事與李衛公異議

儻令安隱忍何以贊貞明

惡草雖當路寒松實挺生人言真可畏公意本無爭

雖曲詞諂諛不當公論而筆勢搏挐有力

故事留臺閣前驅且旆旌

此下言出

藩

芙蓉王儉府楊柳亞夫營清嘯頻疏俗高談屢析

醒過庭多令子乞墅有名甥南詔應聞命西山莫敢

驚寄辭收的博端坐掃欂櫨雅宴初無倦長歌底有

情檻危春水暝樓迴雪峯晴移席牽湘蔓迴撓撲絳

英誰知杜武庫只見謝宣城有客趨高義於今滯下

卿登門慚後至置驛恐虛迎自是依劉表安能比老

彭雕龍心已切畫虎意何成豈有曾黔突徒勞卜倚

衡乘時乖巧宦占象合艱貞廢忘淹中學遲迴谷口

耕悼傷潘岳重樹立馬遷輕隴鳥悲丹觜湘蘭怨紫
莖歸期過舊歲旅夢遶殘更弱植叨華族衰門倚外
兄欲陳勞者曲未唱淚先橫

今月二日不自量度輒以詩一首四十韻干瀆
尊嚴伏蒙仁恩俯賜披覽獎踰其實情溢於辭
顧惟疏蕪曷用酬戴輒復五言四十韻詩獻上

亦詩人詠歎不足之意也

二詩皆從鄭亞桂州
幕中所作其時李衛

公已貶東都分司而未謫崖
州故有扇舉遮王導之句

家擅無雙譽朝居第一功四時當首夏八節應條風
滌濯臨清濟巉巖倚碧嵩鮑壺冰皎潔王佩玉丁東
處劇張京北通經戴侍中將星臨迴夜卿月麗層穹
下令銷秦盜高談破宋聾含霜太山竹拂露嶧陽桐
樂道乾知退當官蹇匪躬服箱青海馬入北渭川熊

固是符真宰徒勞讓化工鳳池春漱澱雞樹曉曛曛
願守三章約還期九譯通薰琴調大舜寶瑟和神農
慷慨資元老周旋值狡童仲尼羞問陳魏絳喜和戎
款款將除蠹孜孜欲達聰所求因涓濁安肯與雷同
物議將調鼎君恩忽賜弓開吳相上下全蜀占西東
銳卒魚縣餌豪胥烏在籠疲民呼杜母鄰國仰羊公
置驛推東道安禪合北宗嘉賓增重價上士悟真空
扇舉遮王導樽開見孔融煙飛愁舞罷塵定惜歌終
岸柳兼池綠園花映燭紅未曾周顛醉轉覺季心恭
繫滯喧人望便蕃屬聖衷天書何日降庭燎幾時烘
早歲乖投刺今晨幸發蒙遠塗哀跛鼈薄藝獎雕蟲
故事曾尊隗前修有薦雄終須煩刻畫聊擬更磨礪
蠻嶺晴留雪巴江晚帶楓營巢憐越燕裂帛待燕鴻

自苦誠先槩長飄不後蓬容華雖少健思緒卽悲翁
感激淮山館優游碣石宮待公三入相丕祚始無窮

結句
太弱

有感二首

九服歸元化三靈叶睿圖如何本初輩自取屈虜誅
有甚當車泣因勞下殿趨何成奏雲物直是滅萑苻
證遠符書密辭連性命俱竟緣尊漢相不早辨胡雛
鬼籙分朝部軍烽照上都敢云堪慟哭未免怨洪鑪
丹陛猶敷奏彤庭歛戰爭臨危對盧植始悔用龐萌
御仗收前殿兵徒劇背城蒼黃五色棒掩遏一陽生
古有清君側今非乏老成素心雖未易此舉太無名
誰瞑銜冤目甯吞欲絕聲近聞開壽讌不廢用咸英

長律惟義山猶欲學杜然但摹其句格不得其一氣
瀆薄頓挫精神縱橫變化處有感二首世所共推然

惟古有清君側以下八句
佳其餘序事殊乏步驟

溫飛卿五首

送人東游

古戍落黃葉浩然離故關
高風漢陽渡初日郢門山
江上幾人在天涯孤櫂還
何當重相見尊酒慰離顏
途中有懷

驅車何日閒擾擾路岐閒
歲暮自多感客程殊未還
亭臯汝陽道風雪穆陵關
臘後寒梅發誰人在故山
春日野行

騎馬踏煙莎青春柰怨何
蝶翎朝粉盡鴉背夕陽多
柳豔欺芳帶山愁縈翠蛾
別情無處說方寸是星河
商山早行

晨起動征鐸客行悲故鄉
雞聲茅店月人迹板橋霜

槲葉暗山路枳花明驛牆因思杜陵夢鳧鴈滿迴塘
登盧氏臺

勝地當通邑前山有故居臺高秋盡出林斷野無餘
白露鳴蛩急晴天度鴈疏由來放懷地非獨在吾廬
杜牧之四首

題揚州禪智寺

雨過一蟬噪飄蕭松桂秋青苔滿階砌白鳥故遲留
暮靄生深樹斜陽下小樓誰知竹西路歌吹是揚州

揚州

煬帝雷塘上迷藏有舊樓誰家唱水調明月滿揚州
駿馬宜閑去千金好暗游喧闐醉年少半脫紫茸裘
秋風放螢苑春草鬪雞臺金絡擎鵬去鸞環拾翠來
蜀船紅錦重越橈水沈堆處處皆華表淮王柰卻回

題永崇西平王宅太尉翹院六韻

天下無雙將關西第一雄
授符黃石老學劍白蟻公
矯矯雲長勇恂恂卻縠風
家呼小太尉國號大梁公
半夜龍驤去中原虎穴空
隴山兵十萬嗣子握琯弓
劉綺莊一首

揚州送人

桂楫木蘭舟楓江竹箭流
故人從此去遠望不勝愁
落日低帆影迴風引櫂謳
思君折楊柳淚盡武昌樓
許用晦二首

將歸塗口宿鬱林寺道元上人院

春尋采藥翁歸路宿禪宮
雲起客眠處月殘僧定中
藤花深洞水榭葉滿山
風清境不能住朝朝漸遠公
韶州送杜司直出嶺

江曲山如畫，貪程亦駐舟。果隨巖狖落，槎帶水禽流。
客散他鄉夜，人歸故國秋。尊前挂帆去，風雨下西樓。

方雄飛二首

登雪竇僧家

登寺尋盤道人煙，遠更微。石窗秋見海山靄，暮侵衣。
衆木隨僧老，高泉盡日飛。誰能去軒冕，來此便忘機。

冬夜泊僧舍

江冬寒近臘，夜寺水天昏。無酒能銷夜，隨僧早閉門。
照牆鐙燄細，著瓦雨聲繁。飄泊仍千里，清吟欲斷魂。

杜彥之一首

春宮怨

早被嬋娟誤，欲妝臨鏡慵。承恩不在貌，教妾若爲容。
風暖鳥聲碎，日高花影重。年年越谿女，相憶采芙蓉。

崔禮山二首

除夜有感

迢遞三巴路，羈危萬里身。
亂山殘雪夜，孤燭異鄉人。
漸與骨月遠，轉於僮僕親。
那堪正飄泊，明日歲華新。

秋日健爲道中

久客厭岐路，出門吟且悲。
平生未到處，落日獨行時。
芳草不長綠，故人無重期。
那堪更南渡，鄉國已天涯。

許文化二首

憶宛陵舊居

舊憶陵陽北，林園近版橋。
江晴帆影滿，野迥鶴聲遙。
鳥徑通山市，汀扉上海潮。
秦城歸去夢，夜夜到漁樵。

塞外書事

征路出窮邊，孤吟傍戍煙。
河光深蕩塞，磧色迴連天。

殘日沈鵬外驚蓬到馬前空懷釣魚興未定卜何年
馬虞臣九首

楚江懷古

露氣寒光集微陽下楚丘
蟻啼洞庭樹人在木蘭舟
廣澤生明月蒼山夾亂流
雲中君不見竟夕自悲秋
春思

初日照楊柳玉樓含翠陰
啼春獨鳥思望遠佳人心
幽怨貯瑤瑟韶光凝碧林
所思曾不見芳草意空深
灞上秋居

灞原風雨定晚見鴈行頻
落葉他鄉樹寒鐙獨夜人
空園白露滴孤壁野僧鄰
醉臥郊扉久何年致此身
早發故園

語別在中夜登車離故鄉
曙鐘寒出岳殘月迥迎霜

風柳條多折沙雲氣盡黃行逢海西鴈零落不成行
洛陽寒夜姚侍御宅憶賈島

夜水動寒色洛陽城闕深如何異鄉思更抱故人心
殘月關山遠閒階露霧侵誰知石門路待與子相尋
落日悵望

孤雲與歸鳥千里片時閒念我一何滯辭家久未還
微陽下喬木遠色隱秋山臨水不敢照恐驚平昔顏
宿翠微寺

處處松陰滿樵開一徑通鳥歸霜磬盡僧語石樓空
積翠含微月遙泉韻細風經行心不厭憶在故山中
寄終南真空禪師

閒想白雲外了然清淨僧松門山半寺雨夜佛前鐙
此境可長往浮生自不能一從林下別瀑布幾成冰

送僧歸金山寺

金陵江色裏蟬急向秋分迴寺橫洲島歸僧渡水雲
夕陽依岸盡清磬隔潮聞遙想禪林下鑪香對月焚
司空表聖二首

江行

地闊分吳塞楓高映楚天曲塘春盡雨方響夜深船
行紀添新夢羈愁甚往年何時京洛路馬上見人煙

塞下

萬里隨城在二邊虜氣衰沙填孤障角燒斷故關碑
馬色經寒慘鵬聲帶晚飢將軍正閒暇留客換歌辭

早春

傷心仍客處病起卻花朝草嫩侵沙短冰輕著雨銷
風光知可愛客鬢不相饒早晚丹邱伴飛書肯見招

上柏梯寺懷舊僧

雲根禪客居皆說舊無廬松日明金像山風響木魚
依棲應不阻名利本來疏縱有人相問林閒懶折書

寄永嘉崔道融

旅寓雖難定乘閒是勝游碧雲蕭寺霽紅樹謝村秋
戍鼓和潮暗船鐙照島幽詩家多滯此風景似相留

李承吉一首

送人入蜀

蜀客本多愁今君是勝游碧藏雲外樹紅露驛邊樓
杜魄呼名語巴江學字流不知煙雨外何處夢刀州

于鄴一首

秋夕聞鴈

星漢欲沈盡誰家砧未休忽聞涼鴈至如報杜陵秋

千樹又黃葉幾人新白頭洞庭今夜客一半卻登舟
張喬二首

送友人歸宜春

落花兼柳絮無處不紛紛遠道空歸去流鶯獨自聞
野橋喧碓水山郭入樓雲故里南陔曲秋期欲送君
送友人許棠

離鄉積歲年歸路轉依然夜火山頭市春江樹杪船
干戈愁鬢改瘴癘喜家全何處營甘旨瀕潮浸薄田
周大朴二首

董嶺水

湖州安吉縣門與白雲齊禹力不到處河聲流向西
去衙山色遠近水月光低中有高人在沙中曳杖藜

哭陳叟

繫馬向山立一柅聊奠君野煙孤客路寒草故人墳
琴韻歸流水詩情寄白雲日斜休哭後松吹不堪聞
劉得仁一首

冬日題邵公院

無事關多掩陰階竹拂苔勁風吹雪聚渴鳥啄冰開
樹向寒山得人從瀑布來終期天目老驚錫逐雲回
裴說一首

題岳州僧舍

喜到重湖地孤舟橫晚煙鷺銜魚入寺鴉接飯隨船
松檜君山迴菰蒲夢澤連與師吟論處秋水浸遙天
韋端己二首

章臺夜思

清瑟怨遙夜繞絃風雨哀孤鐙聞楚角殘月下章臺

芳草已云暮故人殊未來鄉書不可見秋鴈又南回
延興門外作

芳草五陵道美人金犢車綠奔穿內水紅落過牆花
馬足倦游客鳥聲歡酒家王孫歸去晚宮樹欲棲鴉

五言今體詩鈔卷第九

國家圖書館



002452229

